

續文獻通考

卷五一——五四

5 保
5266
70-15



門 5266
號 70-15
卷

續文獻通考卷之五十一

皇明進士雲間王圻纂輯

選舉考 舉官上

宋

寧宗嘉定初袁瓌薦陸持之于朝謂其議論不為空言緩

急有可倚仗寧宗特詔持之秘書省讀書固辭不獲

十二年詔侍從兩省臺諫各舉文武可用之才二三人

時進士潘彙及第廷對剴切漫塘劉宰嘉其志不苟

求與丞相杜範佯薦于朝得宰崑山有政聲

江東轉運司副使真德秀奏曰太平興國中嘗詔諸道

轉運司察訪部下官吏凡罷軟不勝任及黷于貨賄者

續文獻通考卷之五十一

一

王成

俾條上其事狀其清白自守幹局不凡者亦許其明揚
臣仰見祖宗盛時選用監司付以事權者蓋欲其公於
刺舉使貪懦者無所容而廉能者有所勸責任之意蓋
不輕也自嘉泰開禧以來公道不行請囑日盛郡縣之
官有罪狀彰灼爲監司者甫欲案劾已求要路之援以
自脫甚者得以施其反噬之計於是刺之權有不行矣
歲舉之員往往奪於權貴之命孤寒無援者雖盡心職
業不免陸沉之歎膏粱庸駘者苟有所挾劍若執券以
取償焉於是舉之權又有所不行矣是以州縣之間賢
否不分民受其病今陛下更新大化公道昭明寢還乾
道淳熙之舊矣獨縉紳間親故請托之弊未能盡革臣

愚欲望聖慈特詔戒諭中外士大夫相與維持公道使
將指承命者得以展澄清之志而賢不肖有所甄別於
治道豈小補哉

司令許應龍奏畧曰夫一郡之吏察於太守一路之吏
察於諸司滿一期則有關陞之薦逾三考則有京削之
薦歲有常員截然一定固不患其濫也至若政績則聽
其判上初無定數豈固縱其猥濫而無所紀極哉蓋以
効績顯著固未易得若拘以歲薦苟未有其人必以庸
常之流勉強充數其謹重之意蓋可見矣是以剡牘來
上悉從其請或與陞擢或令審察或付中書籍記使賢
者知所勸而不賢者亦知自勉進者以爲榮而未進者

亦有所慕得人之效大率由此豈非朝廷之美意乎奈何人情貪榮競欲速進不顧職事之修否而惟欲露章之薦引頭鑽肘刺不得不已以公道自任者旌別淑慝固不肯由徇其請而樂於周旋者見其既無定數求者必與迨其甚也一章所薦或五六人或十數人載於邸報殆無虛日合一歲而論不知其幾非親故之夤緣則勢要之囑托非閹陞之所不及則京削之所未徧譽過其情則以鉛刀而爲鋤舉非其類則以薰蕕而同噐此豈非士大夫之私心乎吁不意求才之美意而爲士大夫私心壞之也雖然變而通之夫豈無術一曰定刻薦之數二曰嚴保任之法昔皇祐初詔舉縣令而張易侂

薦一十六人上謂輔臣曰所舉猥多豈無干請可令裁定此定刻薦之數者也馮拯請諸司四品以上具表舉人若効績著明當特酬賞不如所舉依法加罪此嚴保任之法者也數旣一定則不容妄舉以徇泛應之私法旣加嚴則誰敢失實以干謬舉之罰如此則公論大明群賢並進蓋有不難致者抑又有當察者昔歐陽修有云善惡之人各以類舉廉謹者舉清幹贓汙者舉貪濁徇私者舉請求苟任其責者或非其人亦安能無妄舉哉太宗皇帝親閱班簿常曰不擇舉主何由得人此清源正本之論直萬世龜鑑也惟陛下與大臣亟圖之江東轉運副使真德秀薦知信州丁黼等五人其狀畧

曰臣竊見朝奉郎知信州軍州事丁黼性本誠實學有師傳修身立朝物論素所推許今爲郡守曾未數月循良豈弟之政已流聞于四方朝散郎通判建康府事會耆年天資耿介履行端莊出自名家老於州縣精明峻潔意氣不衰承議郎提領建康府戶部贍軍酒庫所主管文字李宥性行粹溫規模祥慎早親師友多所見聞澹然自持不爲苟進奉議郎分差建康府諸軍糧料院楊若行方識遠論正氣平靜重自持耻爲表暴從政郎建康府學教授楊邁篤於問學副以詞華心術端良操守無玷此數人者雖其職守不同然質諸衆論皆所謂君子之材非區區擅一長辦一職者之比用敢仰體

朝之意各以實聞伏望聖慈特賜甄擢儻一詞謬妄臣其伏罔上之誅 真德秀又薦洪彥華趙彥覃二人其狀畧曰竊見承議郎江南東路轉運司主管文字洪彥華天資樸茂學問淹該居常務自韜晦不以已長示人而徐考其所爲則言行相副表裏如一曩宰衡之茶陵適值儉歲究心拊字民無流亡至於應辦和糴招募効用皆不擾而集諸司嘗以政最剋聞于朝甫及期年以內艱去邦人父老懷其遺愛久而不忘繼宰信之上饒以惠利爲政如在茶陵時然其恬退自持安於平進故知之者少臣謂如彥華者若加進用俾究所蘊必有可觀從前江南東路轉運司主管帳司趙彥覃賦性

敏明持身潔白擲爲鄂州錄參日其年尚少已爲吳獵
詹體仁所知目以佳士其在漕幕宣力最多賑荒以米
朝夕講究如已休戚臣以廣德兩縣菑傷尤甚九月間
卽令彥覃前往與本部守貳圖所以拯救之方而能悉
心盡瘁不憚勞苦凡所區畫多適事宜給散有方人被
實惠臣比循行至郡士民稱之如出一口聞其滿替皆
願借畚臣謂如彥覃者若寘之煩劇俾効所長亦必有
以自見臣於二人者察之既熟又皆當代去儻不亟加
論薦是謂蔽賢庸敢冒聞以備采擇伏望聖慈將彥華
彥覃特賜旌擢若後不如所舉臣甘坐罪 真德秀又
薦本路知縣政績其狀畧曰竊見江東一道爲縣四十

有三而號爲難治者居其大半蓋上供送使爲數寔繁
月椿版帳率多白撰爲令者朝夕惴恐惟財賦不辦是
憂至於撫循疾苦伸理寃滯往往視爲弗切上下循習
謂之當然有能於煎熬之中少施寬裕之政不專以催
科爲急而以字民爲心其在臣等所當激勸今采諸物
論得十人焉宣教郎知徽州歙縣馮特卿器資清峻學
識通明到官以來孜孜所職至誠篤實一意在民催科
有方不擾而集縣民程暉之子爲盜所殺踪跡曖昧臣
曾委之迹捕乃能多設方畧日夜究心曾未數月罪人
斯得姦兇讐伏寃結獲伸考其風績可謂本道之最奉
議郎知饒州鄱陽縣趙汝俞天族之英篤志爲善清修

雅澹有儒素之風當官而行不爲阿徇廉靜無擾田里
安之宣教郎知信州弋陽縣柴景望學校舊人雅有士
譽強毅自立卓犖不群弋陽舊歲凋敝日甚自其到任
極意肥梳結立義役以革紛爭賣美之弊優卹戶長以
除科較代輸之苦裁決獄訟一出至公人情翕然稱爲
賢令宣教郎知信州玉山縣程榆天資靖重心術端良
蒞官之初適郡守趙不撫務爲苛暴官吏重足而立同
時諸邑鮮不逢迎榆於其間獨能弗改常度慈祥豈弟
藹然有循吏之風去夏邑境洪水驟至榆方在告力疾
而出巡行拊勞不俟申請捐公錢以予民賴以全活者
甚衆宣教郎知池州青陽縣許溪學問淹該材力強濟
池之諸邑曩因宣限困於預借深結至官適逢儉歲朝
夕勤瘁如理家然既償舊逋又免新借邑之瘡痍於是
一洗亦賴以少紓蓋有功於此邑者宣教郎知太平州
當塗縣王洽故侍講師愈之子天資粹雅操行潔修其
爲邑也心乎愛人用刑督賦常有不得已之意士民稱
誦翕然一辭承事郎知寧國府宣城縣尤燿名家之子
生長見聞宣城夙號煩劇燿材力精敏治辦有方務以
恩信及民不爲苛猛歲適旱饑推行荒政曲盡其至殄
除蝗孽宣力尤多臣等每因百姓至庭試加訪問皆稱
其賢已決之訟蕃訴絕少承議郎知建康府溧水縣俞
遷老成詳練通知物情其治邑以省事不擾爲本人甚

安之奉議郎知池州貴池縣蔡汝揆廉謹自將精勤不懈奉行荒政能盡其心奉議郎知池州銅陵縣魏執中持身恪謹爲政寬和始終如一有可稱者右臣等所部縣令之可稱者雖非止此十人而得諸見聞間有未審者不敢遽加論薦自特卿而下人品高下亦各不同大槩主於字民則均在可取之域故臣等輒効舉爾所知之誼伏望朝廷特賜甄錄若後不如所舉臣等甘坐謬舉之罪

衛涇奏舉王觀之等十二人其狀畧曰臣承乏江西閩寄首尾已三年今蒙恩易鎮行且去此一時官吏之政績敢以實聞切見承議郎江南西路轉運司主管機

宜文字王觀之家學淵深天資夷粹往年編入宣幕守荆諭蜀者率賴其助試邑江之德化善政尤多今爲江西運管處事極有條理然未嘗矜能以求名持論主於正大而尤知潔已以律下識者皆以爲遠器朝請郎撫州通判趙時通公族之英自致名第敷歷州縣俱以才稱貳政天府遇事不苟垂滿而罷或者惜之通守撫州就攝郡事邦人既服其明允又稱其廉平驗之行事允有實政承議郎江南西路安撫司主管機宜文字洪傑風度端凝吏能整密生於相閱克守儒風自爲漢陽簽幕諸司已交薦其材及至試邑黃陂治辨之外又有學道愛人之政今爲本司機幕每事明審無不合宜雍容

撥煩廉介可敬陸沉幕屬未盡其長朝奉郎筠州通判孫格七閩之秀早拾儒科明習條章老成端介昨來宰泉之同安殊有能聲今茲通判筠陽凡所關決未始留滯宣教卽知建章軍新城縣何遲策名太學擢第乙科初爲隆興節推當路交薦其才且繼任成都撫幹諸司亦表其廉能試邑新城盡起宿弊催科不勞而辦田里無不安之通直卽知撫州崇仁縣彭耕名父之子克世其美其才足以強濟其心主於寬平崇仁當累政玩弛之餘耕到官數月治聲藹然獄訟既清財賦亦裕推其餘力猶能廣學校築堤岸以惠邑人通直卽知臨江軍新淦縣趙公括學古入官修飭廉謹早年甘守遠次務

師先達以爲文及壯試吏所至去思新淦縣邑素多豪猾公括廉介守法不畏強禦苗耨而髮櫛之吏不能欺邑以大治奉議卽知隆興府新建縣桂如箎儒行吏能俱有足取安於平進廉不近名服勤邑事行且受代臣察其聽斷之間並無過舉通直卽知筠州高安縣潘熏生長名家習熟文獻持心近厚律已以廉其在高安安靜不擾而邑事整整有理問里安之文林卽贛州瑞金縣丞陳景仁奮身上庠遂策名第再轉而爲丞劇邑每事捷決不避權豪游攝邑寄無不辦治州郡才之從政卽隆興府武寧縣丞連元操守端溫學術該洽贊毗邑政潔已奉公靖共自將不事奔競迪功卽臨江軍軍學

教授徐价經學修明文詞贍麗能詳庠序之教務崇義理之文教導有方士類多之已上十二人臣始得之衆言未敢深信及驗之行事委有實績多是經監司守臣論薦非特臣一已私言欲望朝廷特賜審察擢用他時必能効尺寸於事功誠非小補 衛涇又奏舉滕璘等七人其狀畧曰臣荷蒙聖恩分闈江右一道十二州之官吏雖不能遍觀盡識然其間學以從政居官可紀者采諸公論密加考察今得七人知而不舉臣則有罪切見朝奉郎隆興府通判滕璘天資靖重學術淹該早爲省殿試前名不肯輒于捷徑盤旋州縣逾三十年晚進班行未究所蘊今通守本府蒞職公勤協贊爲多從事

江西路轉運司幹辦公事趙師秀操尚清修詞章典麗一第二十七年未脫選曹師秀怡然不以介意自參漕幕處事正平持身潔廉贊畫平允承議郎知隆興府奉新縣潘景伯器度高雅政術疏通三仕於隆興邦人稱之無間言試邑奉新留心撫字剖決滯訟平易近民奉新之人無不賢之宣教郎知隆興府武寧縣趙善臻資性宏達才諳端良既由門蔭以登甲第又中法科以試廷評出宰武寧曾未數月催科不擾而辦獄訟不察而明武寧之人無不德之迪功郎贛州州學教授蔣呂宣稟資重厚行已端良自收科名益進學問分教章貢士譽日隆其誨人以行義爲先不專以文學爲上迪功

經文獻通考 卷之五十一 九 四百七十
郎建昌軍軍學教授黃宜履行粹夷文學醇茂奮從舍
選復取甲科初仕盱江歲月未久然其教人必以規矩
士類服之迪功郎遠州分宜縣尉鄭魏挺學問老成典
刑詳練登名前列自當注擬教授魏挺乃能不卑小官
屈就尉職出入阡陌戢盜安民廉謹強濟邑人稱之以
上七人不惟文學之可采亦有政績之足觀科名皆在
人前職事猶在人後欲望朝廷他時特賜旌擢以爲一
道官吏之勸 衛涇又奏舉徐範等九人其狀畧曰邇
者從臣奏請欲復所知之舉嚴臧否之法臣伏觀從政
郎南安軍大庾縣令徐範名臣之子家有史才試邑大
庾究心撫字居多可紀之績宣教郎知筠州新昌縣

沈鏗名臣之孫修謹好學淳吏民社習心聽斷殊有廉
平之稱修職郎南安軍南安縣令楊洽學問淵深文詞
藻贍爲令南安平易近民迪功郎筠州軍事推官俞機
生長名家優有才具贊幕筠陽事不辭難迪功郎筠州
司法參軍詹學問醇正父子世科政術通明守以廉
介人稱其賢宣教郎知撫州樂安縣董仁澤早擢儒科
兼通世務樂安最爲荒陋仁澤與什植僵民懷其政宣
教郎知江州德化縣事林杲克守家法極有吏能究心
撫摩令修於庭戶之間民皆便之宣教郎知隆興府分
寧縣事陳元衡奮身名第有志事功律已奉公撫民戢
吏百姓安之迪功郎監江南西路轉運司造船塲溫良

輔識度和平幹才整密處事謹審而有辦集之能如範
等者實臣所知欲望聖慈更加考察特賜旌擢 衛涇
又奏舉蕭舜咨等三人其狀畧曰臣近者不度踈外輒
以一道屬吏之實績冒昧上聞繼而博加採訪密致參
考猶有未盡與其避再竇之嫌而有遺才之愧不若冒
三獻之耻而効勿欺之忠竊見宣教郎知撫州金谿縣
事蕭舜咨成均高選尋策名第材猷庸碩操守端方裨
身無瑕臨政不苟金谿凋弊陋邑賴其撫摩寬平之實
人甚安之從事郎撫州軍事判官彭去非奮由門蔭遂
取世科學識醇明器資鯁亮行已不耻守法不阿臨川
前後守臣多資其贊畫廉潔之實人共稱之廸功郎江

州湖口縣尉陳韓夙有師承蚤收科級務爲實學不事
空言志尚既高識趣亦遠儻及其華而用之必能以事
業表見今仕湖口適丁歲饑採荒有術邑人德之已上
三人去替各已不遠輿論既無間言諸司亦嘗交薦驗
之行事誠可旌擢欲望朝廷特賜甄錄以風勵一道之
官吏使居官濶平行已忠實者有所激勸誠非小補
衛涇又奏舉章瑑甄世光二人其狀畧曰臣竊惟用人
之道猶之用器擇人之術比之擇材器不可不及鋒而
用材不阿及時而擇及鋒則多利器及時則多良材臣
前後薦士已成屢竇今於所部又得二人其材與器皆
堪煩使涵養更久必可大觀然知其可使辦事又當及

其英銳早加收拾竊見承務郎監潭州廣積倉兼衙倉
章瑒材力強濟識度精明博通舊聞練達世務本州倉
官前者並緣久例不免侵漁瑒能持身潔廉遂絕此弊
郡有亡金之獄累月不得主名臣委之考鞫數日卒得
其實使之剖析疑滯當無留難迪功郎潭州醴陵縣尉
甄世光奮身儒科曉暢民事出入阡陌未始辭勞而又
不事詭隨能自植立醴陵之治理見効世光之助爲多
已上二人欲望朝廷特賜軫錄他日或有繁難任使必
能辦治惟幸朝廷郎及鋒及時而採取之 衛涇又列
薦徐筠朱著留筠三人其狀曰臣等誤蒙聖恩付以一
道耳目之寄凡所部官吏之庸濁苛刻者不敢避怨具

以實聞悉蒙朝廷施行不勝遠民之幸至於良二千石
治行表表衆所共睹者若知刺而不知舉何以勸功切
見朝請郎權知全州軍州事徐筠學古好修謹身率下
不事表暴力行撫摩刑役清平田里安帖餘事著書有
補後學又能崇教化以厚風俗築城壁以固藩籬其他
善政不一而足朝請大夫權發遣道州軍州事朱著持
身潔廉蓄學醇正居家孝友賦政中和到郡之期雖未
爲久而豈弟之實信服於民財賦獄訟色色整辦加之
志趣端清不爲苟合人品既高政術亦茂朝散大夫權
發遣邵州軍州事留筠存心簡靖臨事寬明雖出相門
實通吏道到官以來能於整辦之中不失拊循之實已

上三人臣等參之頗審若蒙朝廷特賜甄擢決不上孤使令 衛涇又列薦薛洽等六人其狀曰竊惟承流宣化其責在守令揚清激濁其責在監司臣等誤膺委寄既以一路郡守之有治行者冒昧奏聞若及守而不及令何以爲守民者之勸切見奉議郎知潭州長沙縣薛洽持身清潔蒞事醇明謹儉自持不事形跡每月催科僅足則止能藏富於田里不窮民以自豐考之近時可爲庶吏通直郎知潭州安化縣趙崇模胄出相門學有家法明練而不好察公廡而務近民安化民獠錯居崇模以豈弟行之無不馴服用之他日當爲遠器宣教郎知潭州醴陵縣羅羸爲學醇正臨事寬明能於催科之

中不廢撫字之政終日孜孜主於愛人考之行事允有賢業通直郎知潭州湘鄉縣趙伯駿怡靜有守廉介無華剖決得宜不事苛察湘鄉邑大事叢伯駿從容視之若有餘地參之輿論委有能稱宣教郎知道州營道縣蔡師仲性資融明器度開爽達於政術每事練詳而又持身廉勤御下有方若試之事任實爲通才從事郎知衡州來陽縣趙彥飭奮由屬籍自致儒科達於吏能不廢學業往時帥臣朱熹亦嘗舉之今爲來陽居多惠政已上六人臣等互加參稽頗爲詳審欲望朝廷特賜旌擢以爲作邑者之勸他日設不如所舉則謬罔之罪臣等所不敢逾 衛涇又奏舉李鼎等四人其狀曰國家

分道置帥許以察吏臣子以身報國未若薦賢臣承恩
守藩固功閱歲得於考察宜有薦揚切見宣教郎知潭
州益陽縣李鼎資性和平學業醇茂初任宜春簿領繼
爲臨賀教官皆以修潔受知當路循次改秩試邑益陽
適承凋弊之餘力行撫摩之政能修學校以勸士寬期
會以安民獄訟不察而明催科不擾而辦平易近民於
鼎幾之從政郎邵州州學教授陳覲賦資靖共持身端
介平昔安分未始干進舊從朱熹講學尤以名義氣節
爲重分教邵陽極力作成不專事於文辭能誨人以廉
耻恬退有守於覲似之從事郎郴州桂東縣令黃龜鼎
才器疏通器能肅給三仕於桂陽民實懷其惠今爲桂

東縣令乃昔峒寇之所巢龜鼎雖務懷柔亦不姑息革
暴而良漸有端倪還定安集龜鼎大力焉從政郎道
州江華縣令莫价志氣好修文采亦富見於議論每事
正平華之在春陵號爲難治价力行撫字之政不忍鄙
夷其民學道愛人价有志焉已上四人在臣部內具有
實迹可采欲望聖慈特賜褒擢以勵其餘庶見九重不
忘遠之意 衛涇又奏舉朱端常五人其狀曰臣蒙恩
任使一路雖職不專於刺舉至官吏能否亦嘗考察以
備器使今所部守吏有能名者采之公言纔得四五知
而不舉是謂蔽賢伏見朝請郎知南劔州朱端常才學
俱優儒雅飭吏曩宰長州縣事整辦諸司列薦其能朝

續文獻通考卷之五十一
廷常加擢用今守延平尤有治效樽節郡用置惠民倉
庫糴米儲積以助常平闕習禁軍月有按試等第文賞
以厲士卒考其施設實有可觀朝奉郎通判泉州何松
性資明達政術亦優一試劇邑以辦治稱兩爲郡丞以
循良著溫陵浩壤民夷錯雜屯戍軍兵供億以時彌縫
關決賴以協濟承議郎通判邵武軍趙善徐宗室近屬
能自奮勵強用敢決所至有聲通守齊安牙稅增羨十
餘萬緡盡數起解無所欺隱殆爲諸郡之最今倅邵武
合發上供亦不擾而辦宣教郎通判建寧府張國均性
質篤誠遇事不苟奉議郎通判汀州樓懿才華茂美所
至有聲富沙大府民物繁夥臨汀偏州俗習犷悍皆易
贊其守政化大行此五人者考察已久並著能名委有
政績欲望朝廷特加表用以爲官吏之勸 衛涇又奏
舉陳嗣宗等十五人其狀曰臣誤蒙聖恩付以一路玩
歲愒日無補毫分惟有薦賢是爲報效近則親所目擊
遠或採之公言既得其人不敢隱默伏見儒林郎福建
路提刑司檢法官陳嗣宗天資靜重學問深醇斷獄議
刑持平守正處置明允人無異辭文林郎前汀州州學
教授孔夢符文學著稱議論英發曾爲從臣列薦中書
籍記選用從事郎西外宗學教授林士遜風猷醞藉經
學淵源訓導有方麟趾化洽宣教郎前知福州寧德縣
王克恭學問正醇器識宏遠究心撫字遺愛在民繼之

者宣教郎郭伯良器質純厚才識茂明平易近民催科不擾奉議郎前知泉州同安縣章太蒙學術醇正操履端方政尚中和民惜其去久淹州縣未盡其才承務郎知福州長溪縣江潤祖聽訟有方催科不擾濬河以便民耕修學以養士類具有實政非敢溢美承務郎知福州懷安縣趙師玘以宗室子能自飭修撥煩劇綽有餘丹宣教郎知建寧府建陽縣黃千里舍選優等擢第乙科文學議論可備館閣承奉郎知建寧府崇安縣趙必愿克紹家學奪取儒科抱負不凡實爲遠器從政郎建寧府左司理參軍吳端忠稟資仁恕遇事詳明盡心平反獄無冤濫承務郎知福州長溪縣丞黃以大操尚

剛潔政事通明剖決民訟無不平允修職郎泉州安溪縣主簿王仲龍名臣之後學有本源簿領卑官未究其用迪功郎福州侯官縣主簿黃佾詞學優贍論議有餘迪功郎福州閩縣主簿鄧樞履行端潔通曉事情皆限於特科無以自見此十五人或懷才抱藝或立事建功片善寸長悉有可錄量能授任不厭其多伏乞特加旌擢 衛涇又奏舉蔡汝揆等六人其狀曰臣誤蒙聖恩再昇江右闡奇已五閱月日夕搜訪吏之有實政者已得六人焉竊見朝散郎通判筠州軍事蔡汝揆受才膚碩遇事精明昔宰貴池諸司嘗合薦其政今爲高安通守公心闊決郡無留事吏民一辭稱之朝奉大夫前通

判隆興軍府事史復祖優有吏材動守法律三爲郡佐所至有聲隆興滿歸人惜其去考其行事具有條理宣教郎知隆州府豐城縣事汪綬奮自名門留心官業才雖強毅政甚和平本府日放詞狀豐城邑大而訟獨少田里相安俱無間言承事郎知建昌軍南城縣事黃以大家世良吏復親名儒律已廉平示民安靜昔丞長溪臣嘗舉其政績今南城邑政殆過長溪遠甚行且書滿民憂其去宣教郎知撫州樂安縣事孫起予儒學吏能皆足稱述一第三十六年人歎其滯樂安獷俗而起予反著學道愛人之美承事郎知袁州宜春縣事黃應酉有文有政精力英發初登名第鄉黨稱之宜春劇邑而應酉兼有催科撫字之譽是六人者臣不惟觀諸文移之申明而又考諸案牘之剖決不惟采諸士大夫之公論而又訪諸詞訟之細民委得其實故敢冒言欲望朝廷特賜旌擢 衛涇又奏舉畱丙楊恕等八人其狀曰臣竊見朝請大夫知撫州軍州事畱丙稟資重厚賦政和平雖生相門深諳民事丙到官五月不趣迫而事以辦鎮靜不撓田里安之年事以迫若速加擢用猶足以得其數年之力朝散郎擢知臨江軍事楊恕器識沉靜學術醇明備更繁難曉暢吏事到郡踰年臨政不事察察力行撫摩崇尚教化財計昔迫而今寬訟牒先煩而後簡軍民相安人稱其賢朝奉郎漆差通判隆興軍府

事業澄文行粹夷資性誠懇不以館閣清流而不屑吏事不以耆儒宿齒而簡畧訟牘每事詳審精力強明有德有才人愛而敬之朝奉郎通判隆興軍府事俞遷充守家學卓有能聲昔宰溧水其政已爲諸邑之最今倅是邦一力禪贊郡事多賴之搜剔蠹弊而吏不敢肆灼知情僞而民不敢欺施於內外繁劇之任必有可紀通直郎通判南安軍張清臣生自名門習於吏事跋歷州縣安於平進南安斗壘自巽峒擾變以來民產失耕冒佃而經總制欠額類多幾於束手清臣於關決平允之餘能調理財賦以無乏供人所甚難者承議郎通判隆興府事許拔胄出世家持身清謹存心職業不事表暴到官方及數月其見於關決者已多可觀吏民信之畧無間言從事郎充江南西路安撫司幹辦公事徐清叟學業醇茂奮身甲科分教當塗隣境士類從之如歸今茲建畫卒皆可行之實守正不阿足爲遠器從事郎江南西路轉運司幹辦公事方大琮志氣好修文采亦瞻早爲南宮亞選士論稱之主畫漕幕剖決詳明考其行事允有賢業已上八人在本路守貳幹官之內考察頗審誠未多得其間率皆監司累次論薦欲望聖慈特賜甄擢 衛涇又奏舉范應鈴等八人其狀曰臣邇者不揆疎外以一道官吏之政有實績者冒昧敷奏而縣政之卓然可稱者猶未殫舉也宣教郎知撫州崇仁縣事

范應鈴持身清介遇事精明初任尉於吉之永新屢與郡太守爭辨是非而守嘗屈崇仁當積弊難治之後應鈴嚴於吏而寬於民苦節浮泛之費蠲罷亡藝之取私謁不行豪猾屏迹不畏強禦實可大用奉議郎知隆興府南昌縣事趙師陶稟資粹溫持心平正六年嶺外休譽藹然得邑南昌仍在舊所遊學人情至稔之地師陶善待故舊屏絕請托凡民爭訟親自體訪必欲盡得其情而獲罪者皆伏而不怨平易近民尤有賢業承議郎知袁州萍鄉縣事趙彥章文學優長議論公正一第三十五年安恬自若前任本路提刑司幹官以所得京削遜與別司毋老之人今爲萍鄉無非愛人學道之政續

補樂道之宣教郎知筠州高安縣事余珪襟度溫雅政術詳明生於相家宛若寒素初入浙西倉幕已有令譽今於高安凋瘵之邑不事敲朴月解自辦撫摩小民而獄訟平息上下皆安之奉議郎知隆興府新建縣事邵應祥爲學醇正處事寬明分教于衢于徽皆穆士論改秩作邑飾以儒雅能於催科之中不廢撫字之政叅之公議委有能稱宣教郎知撫州臨川縣事趙崇尹賦姿開爽遇事直前犯險潢池以脫陷穽臨川頗號煩劇崇尹到官未久聲譽甚休能於整辦之中不失和平之政考之行事可謂通才承事郎知建昌軍廣昌縣事滕仲宦生長名族服習典刑平進宦途多所敷歷廣昌僻在

山谷風俗頑獷仲宦一以無事理之獄訟簡寡政譽翕然從事郎知吉州永新縣事潘復擢自儒科精曉吏事前者分教蘄春大得士譽今永新鄰接喫峒加以豪戶盤結復調治得宜強者伏而弱者愛之刑役清簡綱紀肅然此八人者皆作邑有善狀字民有實政爲一道所稱欲望朝廷特賜甄錄 衛涇又奏舉吳軫等九人其狀畧曰邇者頒示監司帥臣繼自今凡舉部內人才與夫所知臧否科目之薦務在公心採訪取其才行卓絕績用彰著者指實聞上臣竊見迪功郎撫州州學教授吳軫文學俱優恬退有守始到官舍訪問郡之宿儒率學之諸生親登其門請爲學正提點刑獄孫德輿聞之

謂此風不行久矣不待有求即騰升陟之薦考其教育動有成法從政郎隆興府學教授梁致恭學術醇正質直無華奮自膠庠以取科第留意教養每考察士子於文詞之外孤寒無媒詣臺自舉於其垂滿人惜其去從事郎筠州軍事推官李伯賢生長名家自有植立持身勤恪遇事詳明筠之郡政多其區畫并有條理士論才之修職郎隆興府武寧縣丞趙公珊奮身屬籍卓有吏能律已公平持身寬厚武寧巖邑公珊一以和平佐其長財賦辦治人情安之迪功郎江州德安縣主簿周良學有源流行無瑕玷德安凋弊不可爲邑宰爲之引去良被檄越丞職以攝邑事整治半年不鞭朴而財計蘇

續文獻通考 卷之五十一 一
四十七
民稱其賢從事郎建昌軍南豐縣主簿趙希楚服習家
訓通曉吏道臨事不苟諸臺多所委任本司凡有差檄
究心了辦不表暴而聲譽著人誦其能迪功郎隆興府
奉新縣主簿黃之望才具優長器能肅給蚤歲志學有
聲場屋奮身名第留意職業委以事任皆得其當迪功
郎建昌軍南城縣尉黃師稷天資端謹才諳通明於職
事所當爲者莫不修舉而猶裨贊其長以分任邑事求
之下寮未易多得修職郎興國軍永興縣尉趙崇畏才
識優長政事勤恪奮身科第抗志高騫出入阡陌戡盜
字民境內肅清邑人德之軫等九人實臣所知欲望聖
慈特賜褒擢 衛涇又奏舉趙汝誠等其狀曰臣近舉

撫州教授吳軫等充所知而一路官吏猶有四人焉與
其取蔽賢之罪寧受再瀆之譴敢盡爲公朝言之臣竊
見奉議郎通判建昌軍兼管內勸農事趙汝誠器資峻
拔政術詳明爲丞爲宰當路交薦今倅旰江關決平允
財計辦治人稱其能通直郎知隆興府奉新縣主管勸
農公事趙希普賦性開爽遇事雋明敷歷寢多政譽具
媿催科撫字皆究其心一邑相安人器其業承奉郎知
隆興府武寧縣主勸農公事兼兵馬監押趙師巖智不
執方才無滯用雖生屬籍實事儒素租賦趣辦縣務簡
寡田里騷然民安其政迪功郎贛州司法參軍鄭斯立
經學通明操行端潔手不釋卷月評所推自是館閣之

罷淹汨州縣士論惜之以上四人今舉充臣所知後不
如所言其坐謬舉之罰 衛經又應詔舉李燾等三人
其狀畧曰臣伏見文林郎添差江南西路轉運司幹辦
公事李燾經術精博趣操剛方早從師友多士推服分
教襄陽爲帥臣鄭挺挾私奏劾自是杜門刻志學問不
屑意祿仕堂審掌故列屬寺廷皆辭不就尚淹選調未
厭師虞宜加崇獎以勵廉退奉議郎前荆湖南路安撫
司主管機宜文字陳元勳文采高華吏能強濟素安平
進有志事功方峒寇搶攘宣勞幙府剴裁區置曲盡事
宜帥臣曹彥約嘗以功狀聞于朝廷今已書滿以其才
力使任劇煩優有餘裕承直郎差充江淮荆浙福建廣

南路坑冶鑄錢司幹辦公事鄭準性資邁爽學術淹該
策名儒科通練世故陸沉州縣未究所蘊若蒙選擇必
有以自見於時臣誤蒙聖恩俾分闕寄自揆踈拙無以
補報祇承明詔許之薦舉敢以所知三人者曷昧以聞
如燾之學行實堪臺閣之選若元勳若準俱可以備中
外之職任將來或不如舉臣其坐謬舉之罰 衛涇又
奉詔舉趙崇度等三人其狀曰臣等伏見宣教郎知桂
陽軍趙崇度家法嚴正吏事詳明推其惻怛忠誠之心
施於拊摩愛利之政桂陽爲郡地險而僻民健以器崇
度臨之以至廉行之以不擾人有感服舉無異詞即其
操履允自遠器文林郎知郴州宜章縣趙彥北沉浸詩

書被服儒素其父公說在孝宗朝爲賢監司遺愛去思
今滿蜀道彥比克濟前美不墜家聲今宰山邑政有條
理申嚴舊制結集土丁邑境有備故峒寇之擾止在旁
邑而獨不犯其境百姓以此感之從事郎邵州新化縣
令徐簡出自儒家邃於講學文墨議論能世其傳故施
於邑政藹有循良豈弟之風險俗頑民安其政教善怙
惡懼百里知懷是三人者分處郡邑皆能爲陛下牧養
小民培植國本况崇度乃故忠定公汝愚之子陛下念
其父之忠勲諸子多蒙錄用豈待臣等以爲軒輊特以
職守所在不敢蔽賢如彥比如簡則沉淪無援若不論
薦何由自達伏望聖慈特賜擢用則三人必能有所植

立仰益明時後不如所舉甘坐謬舉之罰 衛涇又奏
舉黃學行等三人其狀曰臣通班秘殿分闈遐藩圖報
國恩所當薦士知賢不舉臣竊耻之臣竊見從事郎前
全州州學教授黃學行識度高華學業醇茂蚤優舍選
復占儒科分教清湘留意樂育鄰境士類從之如歸餘
日著書進而未已守臣曾松徐筠嘗薦其政績文學近
者提刑樂章提舉林行知亦薦其文行俱高臣參酌公
言允有實績從政郎永州零陵縣令劉用行器資沉靜
趨向端方决科効官尤精吏事初任真州楊子縣尉克
舉其職備著公勤制帥黃度守臣潘友聞皆嘗露章薦
其才美今爲零陵令勞心撫字已著善聲稽之輿論允

謂通才迪功郎潭州寧鄉縣主簿李劉學問深粹器識醇明更化之初於貢闈對策論事剴切知舉樓鑰等得其文以爲洋洋是董公孫之對可爲清朝得人之賀既而從臣曾喚何異黃疇若又以其學問淵源文詞秀發可備古作薦之於朝今爲寧鄉部領臣每試之以事見其剖決詳明議論平正表裏無瑕足爲遠器已上三人資歷雖淺文學俱優在臣部內考察頗審况前後各有論薦欲望聖慈特賜甄擢以爲館閣之儲設他日不如所舉臣敢辭謬舉之罰 衛涇又奉詔舉張聲道等三人其狀曰竊見朝請改權發遣永州軍州事張聲道早擢儒科嘗丞冊府文采學問士論所推自去班行游更

塵節今爲永州留心郡政剖決民訟發擿吏姦樽節浮泛之費罷去非義之取如零陵舊有竹稅久已無竹而稅額尚存聲道到任採訪卽爲蠲放客旅舊苦重征多不入城市井蕭條聲道寬其稅額商旅遂通又能損俸助學勤身率下豈弟之政田里安之識者謂其才堪臺閣不當淹抑遠外朝請卽通判潭州軍州事張履信賦資清謹臨事強濟昨宰巖邑已著能聲帥守監司屢嘗論薦通判本州過滿三考凡事任責未始辭難起發經總制錢數目浩瀚稱提新會協贊爲多其他關決舉無淹滯持身廉潔始終如一試以內外劇繁之任必有可觀朝奉郎前通判衡州軍州事廖視器質端方克守家

法嘗任理祿以直去官兩為劇縣治狀稱最衡陽貳郡
備著賢勞承攝永道二州首尾年餘剔除姦弊愛惜財
賦一毫不以妄用代者賴之近雖蒙朝廷差知房陵然
其才術操行宜在激濁揚清之選已上三人在本路守
貳之內不易多得欲望聖慈特賜甄擢他日必能各以
所長見於世用 衛涇又應詔舉游九言等三人其狀
畧曰臣伏覩通直郎主管建昌軍仙都觀游九言資才
剛實不專意於文藝淳熙間知靜江府張拭嘗露薦章
於孝廟朝稱其臨事有斷留意軍伍間事今已三十年
更嘗既多其才益老近任江東撫幹贊畫帥閩區處事
務軍民至今思之但其人過於自許幾有充許之累如

朝廷棄瑕錄用置之幕府或邊鎮任使必能盡瘁報國
有所植立朝奉郎主管台州崇道觀錢文子器識弘毅
不以科目自居頃繇模倣改秩宰邑醴陵不卑其官刻
意民事撫摩良善鋤治姦惡盜賊為之屏息豪猾畏其
風采治民馭軍寬猛得宜偶嘗處事少差未免矯枉之
失如朝廷湔祓處以繁劇州郡或經理財賦必能彈壓
幹旋不至乏事承議郎前通判慶元軍府黃宜世事精
練吏道敏強嘗為劇縣財計不擾而辦獄訟咸得其平
吏畏民愛前後少見其比嘉泰二年有旨令宰執論薦
邊郡守臣謂宜才學優長邑牧有聲足以充選緣其資
格未及且俾實歷通判得倅四明郡政多所裨補海道

利便講之尤熟兼曾在淮郡守官諳悉事體議論可聽
倘蒙朝廷照已降指揮擢用或別有繁難職任其才蓋
所優爲臣竊惟朝廷興舉事功方錄才使過之時此三
人者皆有可用之實不宜真之間地今或嘗因廢黜見
處祠祿或任滿替罷未有差遣是敢冒昧上塞明詔如
後不如所舉臣甘坐謬舉之罪 衛涇又奏舉蕭遵等
六人其狀曰臣蒙恩分闈自揆固功惟念薦賢可以報
上今有當官可紀居鄉有譽察識已熟詎敢壅蔽弗以
名聞臣伏見朝請大夫充荆湖南路安撫司參議官蕭
遵才識優長政事勤恪克守家學蔚有名聞前宰臣侍
從皆舉充著述之選嘗以倅得郡而有恬退之心兩爲

湖南帥慕深知利便軍民相安人誦其德朝請郎通判
潭州軍州事施楫器度恢闕才識明達留意宦業備著
勞能嘗爲淮東倉屬荒政賴其經理爲邵陽倅善拊蠻
徃再貳長沙關決平允不事苛擾闔郡稱之朝奉郎通
判潭州軍州事姜注稟性溫粹持心正平濟美故家飾
以儒雅其試邑贊幙俱有聲稱當路交章至于再四今
倅是邦稱提錢會公私流通人蒙其惠承議郎充荆湖
南路安撫司主管機宜文字謝孫復天資廉謹識見疏
通出自名門精於吏事昨任建寧庾屬能區畫茶利及
宰浦城能字民發姦今贊機幙曉暢軍務措畫犒賞裨
助爲多從事郎全州州學教授謝興甫文行華美氣質

粹和謹重好修學術甚正爲殿試第五名十年不調今始分教清湘到官以來嚴於教養士子賴其作成從事郎新廣南西路提點刑獄司幹辦公事郟夢祥學識該通詞章炳蔚議論守正孝友可稱奮由甲科不自矜耀當分教郴陽兼攝倅職隄防盜賊動中事機今待遠次鄉黨稱其才業此六人者皆當官可紀居鄉有譽前後帥守監司屢有薦舉才之有用於此可見欲望聖慈隨其所長特加錄用他日必能展効不負選掄 衛涇又奏舉趙綸等三人其狀曰臣伏見通直郎知潭州益陽縣事趙綸相門濟美具有典刑天資粹和學識明遠近方更選試邑益陽綸到官之初寬以牧良善嚴以御強

梗民訟以時剖決曲直各得其當催科先出信由並無重疊追擾一邑之政整然可觀從事郎知潭州善化縣事趙彥措屬籍老成儒科自奮持心寬厚律已廉平善化爲潭州附庸爰自前官縱弛之後繼以貪吏哀歛之餘彥措區畫有方鈎索蠹弊不事鞭朴財計自裕一郡之人皆以爲能從政郎衡州來陽縣令祝夢良上庠秀發才學優長吏事詳明如有素習來陽爲衡外邑自比歲盜起鄰境實調發屯駐之衝民不奠居正資安集夢良到任未久一意拊摩平易近民推爲循吏此三人者皆作邑有善狀不負字民之選臣愚欲望聖慈特與甄擢就器使以勸循良 衛涇又奏舉宋億其狀曰臣二

年分闈初乏寸長僅免曠稟寔賴僚佐臣伏見奉議郎
齊僉書武安軍節度判官廳公事宋億學有師承行無
玷闕靜重能守廉潔不污奮由甲科雅安平進用舉主
考第始獲更選以年制所拘遂授僉幙臣在鄉里已知
其賢及來長沙適同王事朝夕相與識察益熟凡擬斷
獄訟悉得其平區處職事皆協于理清不矯亢和不詭
隨一郡實僚少出其右臣嘗乞以倅貳奏辟後準回降
以不曾爲縣難於施行臣實愛其人不忍但已乞令再
任仰荷俞允首尾四載操守如一臣之拙政蒙勛甚多
近日滿替感惜其去而臣又誤叨改畀之命若不再以
億之人才政績僭竇天聽則實有蔽賢之罪其何以勸
來者欲望聖慈察臣所舉出於公論特降德音試以內
外升擢之職俾盡所長庶幾明時無失士之嗟在下免
陸沉之嘆扶持世道豈曰小補

淮東制置使李曾伯特薦陳通判等其狀曰臣恭貳淮
邊洎埃無補見具奉祠歸里之請未忘薦賢報國之忠
卽其周旋事任之間得於嘗試齊啜之熟其有已爲公
朝之所識別本司之所薦辟不敢復贅乃若懷珪璋而
滯邊瓊抱把梓而困泥塗者得二十人焉竊見宣教郎
通判泰州軍事陳力修以經術飭吏以直道事人議論
不凡器識宏遠從事卽克淮西江東總領軍馬錢糧所
幹辦公事陳應先學造前修而益力文爲後進之所宗

退然一儒不競於物是二人者望寔素孚宜備館學之
選直郎通判淮安州軍事李仲賢軍旅之事生長見
聞通敏之才閱歷詳熟文林郎充浙西兩淮發運使司
幹辦公事鎮江府分司陳夢炎閩士之萍實見諸飛輓
有治劇才文林郎差充淮西轉運司提轄催促綱運物
料官孫具會淮士之翹英采諸條陳有事功志是三人
者佐藩條辦漕事幹畧俱優足任邊方繁重之寄迪功
郎淮東提舉司幹辦公事林月卿贊畫臺幙以肅給聞
從事郎僉書招信軍判官廳公事沈遜膚佐理邊城以
公勤著迪功郎廬州舒城縣主簿章公權議論表偉時
賢多以大魁期之今讀其文而信鸞樓枳棘人所共歎

迪功郎濠州州學教授鄧益悃悃無華辭藻絢麗從事
郎滁州州學教授孫子秀刻意問學操履端方迪功郎
泰州州學教授林遷經明行修甚宜厥官從事郎通州
州學教授費弁决科稽古克世其家若乃氣節之克自
植立言論之不爲詭隨俱能風猷之相尚則迪功郎高
郵軍高郵縣主簿余鰲文才俱懿學政兼優明清謹於
三尺惠愛洽於一方則迪功郎高郵軍司法參軍周福
孫從事郎真州揚子縣令茅弁其人也律已以嚴蒞事
以敏讞獄以恕則從事郎林子顯從事郎泰州司理參
軍李賁從政郎高郵軍錄事參軍趙希炤其人也此數
人者雖才行各有不同而器能皆適於用夫廣廈集衆

材而成菁莪自微草而育如蒙睿慈悉賜甄錄隨才器使必有可觀

理宗寶慶元年詔今後見供職及在外帶職從官依元祐十科舊制歲舉三人從右正言虞西請也 三年知江寧縣劉屋為政愷悌慈祥不擾而事辦制閫以賢能薦于朝俾兼幙府 紹定元年梁成大奏乞申嚴薦舉法除陞陟所知政績姑從舊法改官庶吏犯入已贓者許舉主悔舉從之 又奏選人改官舉主五員內用職司一員始為及格近奔競巧取者或用職司三四員甚至五員而寒畯終身不得職司乞下吏部止用一員過數毋令收使從之 成大又奏銓法官吏交承必避親嫌

宗室贊頭充所不許庶革前後積弊乞下吏部遵守舊法從之 留之英奏乞下吏部應銓量官令長貳從容延接訪問民事其疾病癯老者請指揮施行如不堪任職貪酷累被按劾者與別注降等差遣稱量能授官之意從之 二年詔廣西州縣應闕官毋得以白身借補人充攝 三年臣寮言乞下吏部今後縣獄官須曾歷三考有縣令主三員無過犯人許注毋得作破格輕授或監司帥守辟置亦令吏部審實合格方許放行從之 五年詔吏部太常寺行下太學武學胄監自今後補試文臣外任帶朝職與放牒試武臣外任帶閣職與在外貼職同不許放行 端平二年臣寮奏列郡兼簽攝

官之弊乞勅吏部自今內地官吏注闕不必限以年齒
兩淮荆襄初任及再任不許注六十五以上人詔吏部
檢坐累降禁約指揮遍下諸路監司州郡各令遵守見
入幙人並還本任 嘉熙三年詔四川連年擾攘州縣
闕官其赴銓人年二十已上者免試發還曹司庶引放
行注授一次 淳祐元年詔舊制兩任通判人與內郡
一任注廣郡改官年及免作縣人得入倅闕並宣禁制
其令吏部及制閫監司常切遵守仍關辟差窠 是年
詔求人才令內而侍從兩省卿監郎官外而宰執侍從
帥臣監司各舉二三人悉疏其才能委堪用指實來上
以備器使 四年詔臺諫耳目之寄若稽舊章悉由親

擇日今不許大臣薦進 七年臣寮言格法日壞天下
視聽益不美因條陳添差攝局須入奏辟改任薦舉借
補曠職匿過等十弊乞風示中外從之 八年二月監
察御史陳垓奏乞宣諭輔臣申飭吏部未歷郡者不許
爲郎已爲郎者更迭補外未歷縣者必令須入已作縣
者須及任滿闕次必依先後毋或改差庶幾抑僥倖以
重名器從之 十年右司諫陳垓言改官班引之人先
令赴都堂或御史臺各試書判合理法者許集注如不
通且令爲丞再試中方與入從之 是年又詔兩淮極
邊作邑人照川廣例令監司引試書判寶祐三年詔令
宗正少卿歲舉宗學官選人一員 開慶元年詔四川

選人應關陞磨勘改官銓審守臣申辟俸令可從舊隸
宣司審量 丁大全奏士大夫于請州郡者甚衆上曰
遴選賢才宰相責也千里之寄不容輕畀宜審處之
景定元年詔今之天下靡弊極矣所可以轉移變化者
獨有用人一說耳舊來當國者多徇私意貽害不小今
丞相虚心無我詢之同列以用人此轉亂爲治轉危爲
安一大機括機括若差利害匪輕今當立一準的之說
須專求實用勿泛取虛名外之爲監司郡守者當用廉
潔凡稍涉貪污而謀利者汰之內之爲朝士者當忠謹
朴實凡稍涉譁競而沽名者汰之若用舍之意向明白
貪污者可化爲廉潔譁競者可化爲忠朴夫苟用人一
差待其貽毒于民貽害于國而後去之亦已晚矣賈似
道奏乞宣付史館 二年都省言知縣於民最親必五
得改官親民舉狀始以命之重其選也勢利之習燎原
薦舉之意寔失挾貴用賄如取諸寄貪庸得志民不堪
命欲窒其源惟有嚴繆舉之罰是遵祖宗舊制其禁職
薦舉尤當加嚴令吏部日下遍牒遵守施行仍令御史
臺常切覺察 四年詔令侍從臺諫給舍卿監郎官以
上及制總監司各舉所知不拘員限以待量才擢用後
不如所舉則連坐之制宜在必行 五年詔沿江兩淮
制帥監司不許差軍功借補挾術游謁等人權攝害民
如州郡闕員則差曹職官屬縣闕員則差丞簿尉暫時

兼權候正官之任或有違戾令臺臣覺察以聞 又詔令侍從兩省于內外官舉堪充監司郡守者疏其實以聞令中書籍記遇有闕官精加審察取旨擢用如犯賊私當正謬舉之罰

度宗咸淳元年詔朕初踐祚即以人才為先其令侍從給舍臺諫卿監郎官各舉所知二人據實狀限三日以聞勿事溢美之辭而孤責實之意 二年詔侍從給舍臺諫卿監郎官各舉所知二人 五年詔舉人才 六年左史陳懋欽薦人才高真監王積翁二十員

續文獻通考卷之五十一終

續文獻通考卷之五十二

皇明進士雲間王圻纂輯

選舉考 舉官下

遼

聖宗統和中邢抱朴為叅知政事樞密使韓德讓薦按察諸道守令能否而黜陟之 大協人望 十一月詔諸部所俘宋人有官吏抱器能者具以名聞遂官衛德升等六人 聖宗獵雲中故事車駕經行長吏必有所獻節度使進曰臣境無他產惟慕僚張儉一代之寶願以為獻先是上夢四人侍側賜食人二口至聞儉名始悟召見容止朴野訪及世務占對三十餘事由此寵遇特異

興宗重熙九年十二月詔諸職官有治民安邊之畧者悉具以聞 十年十月詔東京留守蕭孝忠舉察官吏清疆者悉具實以名聞

金

世宗大定二年詔隨朝六品外路五品以上官各舉廉能官一員 三年定制若察得所舉相同者即擬旌除若聲跡穢濫所舉官量約降罰 十一月詔求仕官輒入權要之門追一官仍降除以請求有所覬獻及受之者具狀奏裁 六年十一月上諭宰臣曰朝官必慎選其人庶可激勵其餘若不當則啓覬覦之心卿等必知人才優劣舉實才用之 八年七月諭平章政事完顏思

敬曰朕思得賢才寤寐不忘自今朝官出外即令體訪外任職官廉能者及草萊之士可助治者具名以聞 八月諭宰相舉用人才無間親踈令監察御史分路刺舉善惡 九年上曰朕思得忠廉之士與之共治故嘗命五品以上各舉所知于今數年矣以天下之大豈無其人由在上者知而不舉也叅知政事魏子平奏曰可令當舉官者每任須舉一人視其當否以為旌賞上曰一任舉一人則人才或難恐涉干濫又少有所犯則罪舉者故人益畏而不敢舉宋國被舉之官有犯罪者所舉官雖宰執亦不免降黜若有能名則被遷賞且人情始慕進故多廉慎既得任用或失所守宰執自掌黜陟

之權豈可因所舉而置罪耶左丞相紇石烈良弼曰已
申前令命舉之矣 十年上曰舉人之法若定三品官
當舉幾人是使小官皆諂媚于上也惟任滿詢察前政
則得人矣 十一年上謂宰臣曰昨觀點黃五品以上
官多缺而難于得人凡三品以上朕則自知五品以下
不能盡識卿等曾無一言見舉者國家之務朕豈能獨
盡哉 十九年時朝廷既取民所舉望之官而升遷之
後上以隨路之民赴都舉請者徃徃無廉能之實多為
所使而來沽名者詔不須舉行 二十九年十一月宗
聖諭宰臣用人無拘資格時上以選舉十事命奉御
合魯諭尚書省定擬 其一曰舊格進士軍功最高尚

且初除丞簿第五任縣令升正七品兩任正七品升六
品三任六品升從五品兩任從五品升正五品正五三
任而後升刺史計四十餘年始得至刺史也其他資格
出職者可知矣拘于資格之滯至于如此其令提刑司
採訪可用之才減資考而用之庶使可用者不至衰老
省臣擬凡三任升者減為兩任於此資歷內遇各品闕
多則于第二任未滿人內選人才苦辛可以超用者及
北路提刑司所採訪者升擢之 其二曰舊格隨朝苦
辛驗資考升除者任滿回日復降之如正七滿回降除
從七品從五品回降為六品之類今若其人果才能可
為免降尚書吏部擬今隨朝考滿遷除外路五品職事

并應驗考次職滿有才能者以本官任滿已前十五月
以上二十月以下察訪保結具省 其三曰隨路提刑
所訪廉能之官就令定其堪任職事隨宜遷注 其四
曰從來宰相不得與求仕官相見如此何由知天下人
才優劣其許相見以訪才能尚書刑部謂在制求仕官
不得于私第謁見達官違者追一官降等奏除若有求
請覬遺則以奏聞仍委御史糾察上遂命削此制 其
五曰舊時臣下雖知親友有可用者皆遠嫌不引薦古
者舉賢不避親仇如祁奚舉仇仁傑舉子崔佑甫除吏
八百皆親故也其令五品以上官各舉所知幾人違者
加以蔽賢之罪吏部議內外五品以上職事官每歲保

廉能官一人外路五品隨朝六品願舉者聽若不如所
舉者各約量降罰今擬賢而不舉者亦當約量降罰
其六曰前代官到任之後即舉可自代者其令自今五
品以上官舉自代以備交承吏部按唐會要建中元年
勅文文武常參官外節度觀察防禦軍使刺史縣令畿
令并七品以上清官大理司直評事受命之三日于四
方館上表讓一人以自代外官則馳驛奏聞表付中書
門下每官闕即以所舉多者量授今擬內外官五品以
上到任須舉所知才行官一員以自代太傅丞相平章
謂自古人才難得若令舉以自代恐濫而不得實才參
政謂自代非謂即令代其人也止類姓名取所舉多者

約量授之此蓋舜官相讓周官推賢之遺意上以叅政所言與吏部同從之 其七曰隨朝外路長官一任之內足知僚屬之能官每任可令舉幾人吏部擬今內外五品以上職事官長于僚屬內須舉才能官一人數外舉者聽 其八曰人才隨色有之監臨諸物料及草澤隱逸之士不無人才宜薦舉用之吏部擬監臨諸物料內以外路五品隨朝六品以上舉廉能者直言所長移之轉申省差官察訪得實隨才任使草澤隱逸當通下司縣以提刑司察訪呈省隨色人才令內外五品以上職官薦之 其九曰親軍出職內有尤長武藝勇敢過人者其令內外官舉提刑司察如資考高者可叅注沿邊刺史同知縣令吏部擬若依本格資歷恐妨才能若舉察得實者依本格減一資歷擬注尚書擬依旨升品擬注 其十曰內外官所薦人才即依所舉試之委提刑司採訪虛實若果能稱職更加遷擢如或碌碌即隨常調古者進賢受上賞不肖有罰其立之賞罰條格庶使人不敢徇私也省臣議隨款各欲舉人則一人內所舉不下五七人自古知人為難人才亦自難得防數多則猥避賞罰務苟簡不副聖主求賢之意擬以前項各款隨色能舉一人即充歲舉之數如此則不濫而人才得矣每歲貢人數尚書省覆察相同則置簿籍之如有闕則當隨才奏擬

章宗明昌元年八月選才幹之官爲諸州刺史皆召見戒諭之 三年八月諭宰臣任官令久于事 十月勅應保舉官及應中書制者委官覆察言行相符者量與陞除隨朝及六品以上各隨所長用之 六年八月勅官中承應人出職役三年內犯贓罪者元舉官連坐不在去官之限著爲令 承安三年二月諭宰臣任才能雖資品未及亦具以聞毋避親故 泰和二年十二月勅命監察御史非特旨不許舉官 七年正月勅宰臣舉才幹官同議南征事 六月詔朝官六品外官五品以上及親王舉通錢穀一人不舉者罪舉不當者論如律 宣宗貞祐三年三月詔沿河州縣官罷軟不勝任者汰去

令五品以上舉仍許今季到部人內先擇能者量緩急用之 興定元年令隨朝七品外路六品以上職事官舉正七品以下職事官年未六十不犯贓堪任使者一人 三年十月定保舉縣令能否黜陟舉主格 十一月詔朝官七品外路六品以上官歲舉縣令一人 先是監察御史完顏素蘭上言曰臣近被命體問外路官廉幹者擬以差遣若懦弱不公者罷之具申朝廷別議擬注臣伏念彼懦弱不公之人雖令罷去不過止以待闕者代之其能否又未可知或反不及前官蓋徒有選人之虛名而無得人之實跡古語曰縣令非其人百姓受其殃今若後官更劣則爲患滋甚豈朝廷恤民之意

哉夫守令治之本也乞令隨朝七品外路六品以上官各舉堪充司縣長官者仍明著舉官姓名他日察其能不同定賞罰庶幾其可議者或以闕選法紊資品爲言是不知今之事與平昔不同豈可拘一定之法坐視斯民之病而不權宜更定乎詔有司議行之 四年八月勅掌兵官不聽舉縣令

元

世祖至元八年詔舉守令以戶口增田野闢詞訟簡盜賊息賦役均五事備者爲上選陞一等四事備者添一資三事有成者爲中選依常例遷轉四事不備者減一資五事俱不舉者黜降一等 十五年詔自今罷免之官

宰執爲宣慰宣慰爲路官路官爲州官 十六年八月

范文虎薦可爲守令者三十人詔今後所薦朕自擇之凡有官守不勤于職者勿論漢人回回皆論誅之且沒其家 十九年中丞崔彧言選用臺察若由中書必有偏徇合從本臺官選擇因敕御史臺得選御史 時監察御史魏初上疏曰舊制常叅官諸州刺史上任三日舉一人自代况風紀之職與常員異請自今監察御史按察司官在任一歲各舉一人自代所舉不當有罰不惟砥礪風節亦可爲國得人 二十年四月禁近侍爲人求官紊亂選法 二十四年敕行省宣慰司勿濫舉官吏 二十八年詔路府州縣除達魯花赤外長官並

宜選用漢人素有聲望及勲臣故家并儒吏出身資品相應者佐貳官遴選色目漢人參用庶期于政平訟理民安盜息

趙天麟策畧曰選用之法莫貴於德莫急於才才德兼全者大丈夫也德勝才者君子也才勝德者豪英也有德無才者淳士也有才無德者小人也才德兼無者愚人也淳士以上四德皆所當用也小人愚人皆所當棄也於是辯三德分而為九科簡八才分而為二十六等所謂三德九科者一曰正直之三科直而溫也亂而敬也擾而乂也二曰剛德之三科剛而塞也強而毅也簡而廉也三曰柔德之三科柔而立也愿而恭也寬而不

也翁受敷施九德咸事臯陶告舜詳具虞書所謂八才二十六等者一曰贊化之才三等文史也禮官也樂官也二曰銓選之才三等知人也敬賢也考校也三曰風憲之才二等糾察也廉訪也四曰戎事之才六等宿衛也籌計也督領也鎮防也屯田也芻養也五曰政事之才四等使臣也決斷也農桑也董役也六曰監守之才二等關津也營造也七曰錢穀之才二等明利也算數也八曰方術之才四等僧官也道官也醫官也陰陽也八等之才以德為基方今俳優之戲具見喜之庸人間有懸金印衣紫服者竊恐臣下或有勤勞將士或有當賞而覆盆難照者聞斯事則不能不起悵悵之心而解

其體焉此馬周所以馳騁豎倡子鳴玉曳履同立於朝
而上疏以諫文王也伏望陛下以三德九科八才二十
六等之說明諭選曹使之從事於斯凡未嘗進而初進
者據此法而置之於所宜之方凡已進而考當流轉者
據此法而就改於當然之地更望陛下惜名器之重勿
以假于人如是而行之何患弊之不革乎何患官之不
稱乎官稱而政成政成而民安民安而國慶也

陶安氏曰銓選重內輕外自古爲然今官京師者稱羨
任官中原者次之江南又次之接境又次之邊遠又次
之故仕由江南者不得歷中原自中原出邊遠必超進
資格用是莫不重京師中原而樂趨於江南接境邊遠

均一在內者固重而在外者亦不輕

成宗元貞元年命廉訪司及省臺選官覈實定其殿最以
明黜陟以中書省臣奏近者阿合馬桑哥怙勢賣官不
辨能否止憑解由選調由是選法大壞故有是命是
年中書省臣言樞密院御史臺例應奏舉官屬其餘諸
司不宜奏請今皆請之非便詔自今以後專令中書奏
擬大德元年四月省臺議上風憲事宜乞依舊不立
臺選惟御史及本臺首領官許自舉用廉訪司必擇蒙
古人爲使或闕則以色目世臣子孫爲之其次參用色
目漢人各省文案聽行臺委官檢覆有宿衛近侍奉特

百令臺憲擢用者必須明奏然後任之行臺御史秩滿而有効績者或遷內臺或呈都省遷調廉訪司亦如之不稱職者省臺擇人代回未歷有司者授任牧民經省臺同選者聽臺自調中書或用臺察之人亦宜臺臣同議各官府風憲官毋得輒入體察制曰可 三年立遷官之法從七以下屬吏部正七品以上屬中書三品以上非有司所予奪由中書取進止自六品至九品爲敕授則中書牒署之自一品至五品爲宣授則以制命之三品以下用金寶二品以上用玉寶有特旨者則有詞其理算論月日遷轉憑散官內任以三十月爲滿錢穀與守以二歲爲滿而理考通以三十月爲則內任官

率一考陞一等十五月進一階京官率一考視外任減一資外任官或一考進一階或兩考陞一等或三考陞二等四品則內外考通理此秋毫不可越然前任少則後任足之或前任多則後任累之一考者及二十七兩考者及五十七月三考者及八十一月以上遇陞則借陞而補以後任此又其權衡也 七年議文翰師儒難同常調翰林院宜選通經史能文辭者國子學宜選年高德邵能文辭者須求資格相應之人不得預保布衣之士若果才德素著必合不次超擢者別行具聞 八年詔父子兄弟有才者許並居風憲 又詔樞密院宗正府等遷調官員雖經特旨用之而于例未允者亦

聽覆奏 九年令御史臺集賢翰林院六部于五品以

上各舉廉能識治道者三人行省臺宣慰廉訪司各舉

五人 十一年武宗未改元 中書省臣言內降旨與官者八

百八十餘人已除三百未議者猶五百餘人請自今越

奏者勿與帝曰卿等言是自今不由中書奏者不與官

是年御史大夫言舊例中書省樞密院御史臺宣政

司得自選其人他司悉從中書銓擇近臣不得輒奏如

此則紀綱不紊帝嘉納之 是年中書省臣言內外選

法向者有旨一遵世祖成制兩宮近侍遷叙惟上所命

比有應入常調者夤緣驟遷其已仕廢黜及未嘗入仕

者亦復請自內降旨臣等奏請禁止蒙賜允從自後所

降內旨復有百餘臣等已嘗銓擇奏行第中書政務他

人又得輒請責以整飭其效寔難自今銓選請如前制

非由中書議者毋得越奏制從之

武宗至大三年敕尚書省事煩重諸司有才識明達者並

從尚書省選任樞密院御史臺及諸有司毋輒奏用違

者論罪其或私意請託罷之不叙 至大五年 仁宗時未改元

敕國子監師儒之職有才德者不拘品級雖布衣亦遷

用

仁宗皇慶元年謂侍臣曰郡縣官有善有惡其命臺官選

正直之人為廉訪司官而體察之果有廉能愛民者不

次擢用則小人自知激勵矣 是年敕李孟博選中外

才學之士任職翰林 十二月中書省臣言世祖定立
選法陞降以示激勸今官未及考或無故更代或躡等
進階僭受國公丞相職諸司已裁而復置者有之今
春以內降旨除官千餘人其中欺僞豈能悉知壞亂選
法莫此為甚帝曰凡內降旨一切勿行

英宗至治三年春正月敕常調官外不次銓用者但陞以
職勿陞其階

泰定帝泰定二年選守令推官舊制臺憲歲舉守令推官
二人有罪連坐至是言其不便復命中書於常選擇人
用之

太宗至順三年監察御史陳思謙言銓選之弊入仕之門
太多黜陟之門太簡州郡之任太淹朝省之除太速欲
設三策以救四弊一曰至元二十年以後增設衙門冗
濫不急者從實減并其外有選法者并入中書二曰宜
參酌古今設辟舉之科令三品以下各舉所知才則受
賞失實則受罰三曰古者刺史入為三公郎官出宰百
里蓋使外職識朝廷治體內官知民間利病今後歷縣
尹有能聲善政者受郎官御史歷郡守有奇才異績者
任憲使尚書其餘各驗資品通選在內者不得三考連
任京官在外者須兩任乃遷內職績非出類守不敗官
者則循以年勞處以常調凡朝缺官員須十二月之上
方許遷除命中書議行之 天曆元年韓鏞僉浙西廉

訪司事特舉烏程縣于文傳治行爲諸縣最

寧宗初即位詔監察御史肅政廉訪司官并內外三品以上正官歲舉才堪守令者一人申達省部先行錄用如果稱職舉官優加旌擢一任之內或犯贓私者量其輕重黜罰

順帝元統元年命臺憲部官各舉才堪守令者一人至元元年伯顏請內外官悉循資銓注今後毋得保舉滯滯選法從之至正五年詔定薦舉守令法七年以連年水旱民多失業選擇臺閣名臣二十六人出爲守令八年詔京官三品以上歲舉守令一人守令到任二月亦舉一人自代十二年詔隨朝一品職事及省

臺院部諸正官各舉循良才幹智勇無全堪充守令者二人知人多者不限員數各巡試用守令並授兼管義兵防禦諸軍與魯勸農事所在上司不許擅差守令旣以優陞其佐貳官員比依入廣例量陞二等任滿驗守令全治者與真授不治者全削二等依本等叙半治者減一等叙雜職人員其有智勇之士並依上例凡除常選官於殘破郡縣及迫近賊境之處陞四等稍近賊境陞二等十六年命六部諸監院正官各舉才堪守令者一人

元朝舊制銓曹有行止科吏主之日具內外官十名上中書省中書籍以遷擢其後吏怠不爲意仕者淹滯有待

選十餘年者至正時危素責吏日具五名五日一上中書吏樂易習各思奉職而又淵者獲申

皇明

國初令在外官員有政蹟者舊制許巡按等官奏舉其後又有旌異之名今錄事例于後

凡監察御史按察司官巡歷去處但知有司等官守法奉公廉能昭著者隨即舉聞

太祖洪武十五年正月命天下朝覲官各舉所知一人左春坊正字魏德壽舉文學汪叔瑜等詔有司各以楮幣聘之十二月吳沉揭樞薦方孝孺學行上召人見喜其舉動端雅曰此莊士當老其才而用之遣還

鄉尋以仇家得罪詞連孝孺籍其家械送闕下上

識其名特令開釋十七年九月御史秦元之薦金陵

處士陳遇上召語大悅遂日侍帷幄多所獻納車

駕幸其第者再命之官輒辭既而命為翰林學士

者再又固辭尋命為禮部侍郎進禮部尚書皆固辭

遇淨澹恬退始終一致宸翰時加存問眷待之厚隆

於勳戚尋卒三十一年閏五月建文帝詔內外

五品以上文官及縣令薦賢才定保舉連坐法

成祖永樂九年閏十二月吏部尚書蹇義同六部等官上

言在外布按二司府州縣官職在承流宣化以撫字為職必須得人得入之道在銓選精嚴薦舉有法宜令在

內文職七品以上在外五品以上及縣正官各舉所知
賢能廉幹堪任牧民及居風憲者一人吏部考驗如果
賢能量材擢用其所保非才或授職之後闕茸貪污舉
主連坐 上是其言 命所司速行之

仁宗洪熙元年十月都御史劉觀王彰李素奏舉才能之
士前應天府尹于潛等十餘人 上曰卿大夫所舉必
當昔孫抃言吾輔政無功惟薦一二臺臣無愧卿等必
能知此復 諭之曰古者除官則署舉主姓名貪穢則
連坐今亦當循此法

宣宗宣德元年十二月楊士奇薦行人王翺為山東道御
史七年八月 上御奉天門視朝罷召楊士奇楊榮至

榻前 諭曰今春 命京官三品以上者舉方面郡守
後又出舊作招隱猗蘭之詩以示意已踰半歲都不舉
一人近因卿二人舉黎恬等朕思今天下之廣豈無人
才但羣臣不以國家生民為心又無以忌嫉注念故往
往視朕言為虛文吏部怠忽至此其降 敕責之 十
年 詔府州縣官廉勤公正能恤民者親臨上司宜以
禮待仍具其政績奏 聞以憑旌擢
英宗正統元年正月大學士楊士奇以侍講劉永清才堪
繁劇薦為廣東右布政使 二年九月楊士奇等上疏
言宣德七年以前藩臬二司及府州正官惟聽吏部所
舉權衡獨擅聞見不廣未盡得人百姓受害是以 宣

宗皇帝 勅令大臣保舉自茲得人遂多間有一二非才蓋緣舉主審察不至亦或徇私不公所致昔唐太宗命在京三品以上官舉郡守縣令後來致天下斗米三錢之效近年有等京官無人舉保造爲謗語專欲隳壞先帝良法伏望 聖斷仍遵 先帝 勅旨行但所舉之人籍記舉主後有犯贓必明正舉主之罪則人知謹畏不敢徇私官必得人矣 詔從其議

景皇帝景泰三年十二月申 勅薦舉

憲宗成化四年十二月雲南道御史戴用言六事其一言公薦舉 上曰今後兩京四品以上官吏部具缺朕自簡除方面官照正統間例保舉餘付所司計議以聞

七年奏准有司官員必待三年六年政績卓異方許薦舉仍令吏部先察舉主舉者廉即用其人不必覆勘舉者非人雖有政績亦必覆勘

孝宗弘治六年奏准各處巡撫巡按并布按二司遇府州縣官才行俱優者無分歲貢吏員出身一體保舉五品以上官員果有才德出衆者開報本部奏請定奪 九年奏准在外布按二司府州縣等官及教官有政績才行者並許撫按奏舉 十八年奏准凡天下諸司官員才行超卓者撫按官各屬官但有誠心愛民者雖雜流出身一體旌獎

武宗正德十一年令有司歷任二年之上果有政績卓異

方許撫按薦舉職濫連坐

世宗嘉靖九年題准撫按薦舉官員須歷任年深政績卓異方許舉奏若有不公及所舉之人或以貪酷等項問革吏部舉奏連坐 十一年題准朝覲年分考察既畢備查被責方面有司官員追究所舉巡按御史四人以上革職閑任二人以上降一級調外任一人罰俸半年

十七年 詔撫按官有濫舉市恩及賢否倒置舉劾異同者該科不行糾奏一體究治 二十一年題准撫按官不許將升遷任淺及去任久者一概薦舉仍通行直隸各府浙江等按察司每年終將撫按及別差御史獎勵過官員批詞造冊送部查所薦劾并開報考語或

一人自相牴牾或彼此薦劾不同考語賢否各異題調勘實罪其誣者 四十一年題准如有被劾考察革任致仕聽劾聽調等項撫按不許更行舉劾如違叅究仍將奏詞立案 四十三年議准養病丁憂升遷去任官員撫按若有舉無劾聽吏部一體查究 四十五年議准撫按官在地方未及半年丁憂養病者俱不許一槩

舉劾

穆宗隆慶六年題准今後各撫按衙門糾劾庶官擬為民者必述其貪酷之實擬閑住者必述其不謹罷軟之實擬致仕者必述其老疾之實擬降調改教者必述其行止未虧不宜煩劇之實應提問者不得止論罷官已經

降調者不得再論不及如有仍前議擬失當者聽本部
參究

今上萬曆十年議准撫按官被論不拘罷降勘調聽用及
丁憂雖係半年之上不許舉劾若遇考察年近撫按止
有一員見在而見在復有丁憂被論者不在此例 又
議准撫按官舉劾應會同者照例會同如果獨見甚真
即從直具奏不必以異同為嫌

凡保留官員巡按仍會上司覆勘即與奏聞以憑旌異陞
用若有作弊妄保者罪坐所由

凡在外有司官員果有政績深得民心者任滿去職許令
姓保留

總督及中差御史舉劾事例

世宗嘉靖十五年題准中差御史舉劾官員內係專屬者
量為查覆其餘仍候撫按奏到之日參酌相同一併題
請 二十六年令總督都御史并中差御史所劾吏部
查訪相同即與題覆不必候撫按奏到 三十八年令
中差御史止許舉劾本差事內官員如違參治

兵馬舉劾事例

凡巡視五城御史舉劾嘉靖四十年題准將兵馬等官每
歲終會本舉劾 四十二年題准南京五城兵馬照在
京事體行

穆宗隆慶四年題准今後兩京五城兵馬司官歲終不必

舉劾只令各城御史差滿備造考語送部院以憑查考
今上萬曆五年題准五城兵馬歲終舉劾之外如有貪酷
顯著壞法殃民者仍不時叅劾

辟舉

宋

理宗寶慶三年詔銓部今後司法叅軍不許以諸司年勞
出官人注授諸道檢法官照條格差注憲司無得妄辟
從梁成大之奏也 紹定四年臣寮奏乞戒飭諸道監
司除正任屬官外不得別令見任官入幕違者定行奏
劾從之 五年詔二廣監司今後武臣非經公朝拔擢
不許辟郡特科人不得辟入郡幕如遇闕守祇干隣郡

差攝著為令 淳祐十一年詔諸道制總監司州郡不
得緣堂除部注之闕撓越申辟縱元係辟闕若見任有
人亦不許預辟下次仰常切遵守如違將求辟人降罷
時中書省言乞辟校勘檢閱等官從之 詔襄蜀兩
淮極邊并新復州郡縣及二廣惡弱去處或遇闕官許
令斟酌辟上 景定二年詔有連年闕正官處許監司
選辟 三年詔安豐六縣陞為軍令沿江制司選辟軍
使一次以其縣里迢遙邊鄙險要也 四年詔吏部具
諸路見闕知縣不拘常格限十日許人指射限滿無人
注者令監司郡守列銜奏辟一次 時衛涇奏辟宋億
充潭州通判其狀曰臣契勘潭州管縣十二獄訟繁多

事緒叢委全藉倅貳相與協力濟辦其有久贖畫諾備
宣賢勞廉潔著聞士論推服就俾關決允爲公舉臣伏
見宣教郎武安軍僉判宋億資稟粹美學問深醇奮身
科目雅安平進三任九考始脫選階今爲僉幕已遂過
滿凡擬斷民訟共稱公平臣自到任以來見其處事明
審不爲詭隨持身廉勤不自表暴一郡僚屬少出其右
臣今照得通判潭州軍州事張履信合在今年十月滿
替已辦取接下政鮑華據張履信繳申鮑華回書稱以
地遠艱於涉歷別求便利闕次欲望聖慈就差宋億抵
替鮑華見闕已差下馬相改替宋億不特倅貳之得人
郡事亦賴以協濟庶使本路官吏知廉平有守如億者
得見知於公朝而寡廉鮮恥之人聞風知慕莫不洗心
易慮以趨事赴功所謂崇靖退以抑躁競勵廉隅以革
奸貪激揚勸沮之方莫此爲急 徐鹿卿嘉定間教授
南安軍辟幹辦福建安撫司公事後真德秀復辟宰南
安 許炳登嘉定壬戌進士授寧鄉縣尉轉運使李公
鼎惜其才行辟置運幕 張康湘潭人早孤力學旁通
術數江萬里留夢炎皆推重之辟置幕下 王登少讀
書喜兵法慷慨有大志舉淳祐四年進士調興山主簿
後馬光祖辟充叅謀官遷京西提點刑獄 賈似道帥
荆辟萬鎮充公安書院山長不赴 魯仕能淳祐甲辰
進士任監利令應王登辟充沅州錄事兼餉事 李申

續文獻通考卷之五十二
四百一十六
之知全州灌陽縣未滿乞致事轉承事郎歸杜門讀書
號勇退居士州長辟之不納

金

宣宗貞祐三年三月詔河北州縣官令文武五品以上辟
舉不聽以他事差占仍勒終任有勞績者但陞遙領之
職應降罰者亦止本處居住時河北殘毀吏治多苟且
故著是令 興定五年制辟舉縣令考平者元舉官不
得復舉他人舉之者聽後以舉官或私其親或徇于請
求或謬于鑒裁而妄舉數歲之間以濫去者九十餘人
乃罷辟舉縣令之制元光元年四月更定辟舉縣令法
行之

哀宗正大元年立辟舉縣令法命監察御史司農司官先
訪察隨朝七品外路六品以上官清慎明潔可爲舉主
者然後移文使舉所知仍以六事課殿最而升黜舉主
旣爲之盡心而被舉者亦爲之盡力是時雖迫危亡而
縣令號得人由作法有足取云

元初世祖分藩在秦辟蕭與楊恭懿韓擇侍秦邸與以疾
辭授陝西儒學提舉不起 世祖初凡諸王分地與所
授湯沐邑得自舉其人以名聞朝廷而後授其職 孟
祺爲東平嚴實辟掌書記後官嘉興路總管 姚樞辟
王揮爲詳議官尋擢監察御史 姚天福以才辟懷仁
丞至元五年拜監察御史累官叅知政事兼大興府尹

商挺爲嚴忠濟辟任經歷挺累官樞密副使

陶安曰銓衡重守令之選而經歷次之蓋不輕以授人也自幕僚不辟於長官而命于朝得以均禮抗論彼可于上此否于下彼非于前此是于後準律而裁之當也據理而行之決也其責任豈易乎哉

張孔孫以文學名辟萬戶議事官累官提刑按察副使陶安曰朝廷立制使士出而致用其目有三曰進士也曰學官也曰儒吏也州郡吏曹士或不屈從而進士拔一于千百未易猝與寧受辟爲學官耳

至元十九年詔兩廣福建五品以下官從行省就便銓江二十六年詔以雲南行省地遠州縣官多闕六品

以下許本省選辟以聞 元明善爲董士選辟署省掾累官翰林學士

皇明

吏部職掌凡內外大小官員悉聽本部銓除轉擢並無辟舉之例間有撫按官以地方多事奏請改調陞職者亦必下吏部覆議再奏然後允行

穆宗隆慶元年十二月吏部請令兩京九卿三品以上堂上官併各科道等官博訪才畧過人忠誠任事可任諸邊督撫兵備有司及熟知屯鹽利弊堪清理塩屯之選者各舉所知上請簡用異時功罪併及舉主上從之

四年三月吏部言各處撫按叅劾故事止施于州縣

正官而不及位貳教官中間雖有不肖彰聞者遠則必待三年黜落近則改陞正官俱屬寬縱不足以示懲請下都察院行各撫按所屬佐貳以下罪過顯著者遵旨逮問差薄者革任閒任每季具題以備覆奏報可

五月調南京操江右僉都御史吳時來於外任初時來疏薦所部有司至五十九人吏科光懋等論時來濫舉市恩請調外任吏部覆可且禁自今陞遷行取及任淺者毋槩列名薦中 七月奪總督宣大山西撫臣陳其學陝西巡按潘民模俸一月坐提薦有司失格也時高拱議定薦舉格凡陞任行取及俸淺等項不許槩列疏中而其學等首犯禁于是拱復奏請申明前格今後撫

按官止稱其差已滿例當舉劾訪得某某賢能有何政績所宜薦揚某某不職有何證狀所宜糾劾此外雖當久任者亦不得與列 上是之仍令宣示各省一體遵行違者聽該部叅治 五年十一月直隸崇明縣縣丞孫世良已陞吉府奉祀正詐爲縣人黃善述等上疏乞留吏部庶得其狀請下世良于大理且言近來狡黠成風凡有司不得志去任徃徃邀求無賴詣 闕奏保爲吏者既啖以目前之利而又許爲他日之逋王爲民者既餌其目前之賄而又冀爲他日之憑藉彼此煽惑以售奸欺不一重處恐將來效尤無所抵極乞行通政司以後值奏保官者先送兵馬司禁錮候本部研鞫如有

前弊必以法痛繩之報可 六年二月吏部言邇來薦舉明例限制甚嚴但臣前以廣東多事拊循在良有司總校其正官以進士居三之一舉人居三之二皆擇年力富強才識通敏者以充而監生以下不與焉若使撫按保薦亦拘近例則科目多而與薦少非所以示風勸也今宜于廣東舉劾另立科條如有弭盜安民循良著績者毋拘多寡盡登薦劾本部更加諮訪亦盡數行取超擢他省不得援以爲例 從之

今上萬曆九年正月初十日 上勅都察院曰近來薦舉汎濫屢有 明旨禁論通不遵守今後撫按官薦舉查照本年以前額數不許聽囑徇私偏濫都察院嚴加考

覈奏請

十九年三月兵科給事中葉初春奏議舉劾

曰夫官紳才品有賢有不肖黜一不肖所以爲用一賢者地也但世所稱不職雖出郡佐邑長而監司以上鮮可尋刺惟在攬轡之臣加之意而已邇來按差復 命指摘過嚴于卑秩低昂脫畧于大僚即有論列多取離任而見在鮮及即論列見任多擬降調而重處罕聞矣以故彰瘡風微去留途塞甚至衰朽不堪士論共鄙者尚不甘心安分反噬噉噉 國家綱紀所存幾何臣謂御史爲 朝廷持三尺按一方正當以舉劾爲風裁不當以崇卑爲軒輊且存恕美名也非所加于衰庸方今大計伊邇品隲方殷撫按行有舉劾用備考察在此黜

陟大典關係匪輕臣願 陛下特 勅該部嚴行撫按
 諸臣綜核惟公糾彈罔避固不可偏托耳目誤用聰明
 亦不可優假尊崇苛求卑小除官箴大壞者毋一日苟
 容即才守未至多疵而年力已無可望正須直陳衰狀
 擬以退休况 朝廷原有致仕一例以示優也非示辱
 也按臣何不明白援引而務輕處示長厚為哉若憲臣
 疏或有遺而輿論更有難掩聽該部從公徑處用勵將
 來庶仕路清人心警亦除莠扶苗之意乎 上下其章
 于吏部

續文獻通考卷之五十二終

續文獻通考卷之五十三

皇明進士雲間王圻纂輯

選舉考 考課上

宋

寧宗嘉定九年詔邊縣擇才不拘常制其餘並遵三年之
 制 十年嚴試法官七等之制

理宗紹定六年右正言何琮乞倣紹興成憲內委省部外
 責監司嚴糾州縣凡赦令德音寬恤事件恪意奉行仍
 委監司取見行事實類申朝廷攷其違戾重寘于罰從
 之是年何琮又奏乞申飭監司賑濟結局將所部州縣
 奉行臧否從公比較第列來上仍命大臣合監司救荒

績效總課殿最以示賞罰從之 淳祐二年考功郎官
劉漢弼言吏部考功條法十六事上曰當付外施行

度宗咸淳三年危察奏課吏當嚴考覈之法從之

遼

太宗會同二年閏七月以南王府二刺史貪蠹各杖一百
仍繫虞候張備鬼箭選郡臣爲民所愛者代之 三年
六月東京宰相耶律羽之言渤海大素賢不法詔僚佐
部民舉有才德者代之

聖宗統和九年七月詔諸道舉行能察貪酷 十二年六
月詔州縣長吏有才能無過者減一資考任之 開泰
三年十二月劉晨言殿中高可垣中京留守李可舉決

獄明允詔超遷之

太平六年十二月詔南北諸部廉

察州縣及石烈彌里之官不治者罷之詔大小職官有
貪殘虐民者立罷之終身不錄其不廉直雖處重任即
代之能清勤自勵者在卑位亦當薦拔其內族受賂事
發與常人所犯同科

興宗重熙十一年七月詔外路官勤瘁正直者考滿代不
治事者即易

道宗太康元年六月知三司事韓操以錢穀增羨授三司
使

金

金考課法凡內外官之政績所歷之資考更代之期去就

之故秩滿皆備陳于解由吏部據以定能否又撮解由之要于銓擬時讀之謂之銓頭又會歷任銓頭而書于行止簿行止簿者以姓爲類而書各人平生所歷之資考功過者也又爲簿列百司官名有所更代則以小黃綾書更代之期及其所以去就之故而制其銓擬之要領焉凡縣令則省除部除者皆通書而各疏之

章宗明昌三年九月諭宰臣隨路提刑司舊止察老病不任職及不堪親民者如得其實即改除他路提刑司體察得實勿復注親民之職上問考課法今可行否右丞相夾谷清臣曰行之亦可但格法煩則有司難承用耳尚書右丞劉瑋曰考課之法本于總核名實今提刑司

體察廉能賦濫以行賞罰亦其意也若別議設法恐涉

太煩上問唐代何如瑋對以四善二十七最 六年十

一月初定縣官增水田升除制 承安二年十一月諭

尚書省猛安謀克既不隸提刑司宜令監察御史察其臧否 十二月勅御史臺糾察諂佞趨走有實跡者

熙宗天眷三年四月溫都思忠檢問諸吏得廉吏杜遵晦以下百二十四人各進一階貪吏張軫以下二十一人皆罷之 八年四月遣叅知政事等廉察官吏

世宗大定七年十一月上謂宰臣曰聞縣令多非其人其令吏部察其美惡明加黜陟 十年十月上謂大臣曰比因巡獵聞固安令高昌喬不職已罷之霸州司侯成

奉先奉職恪謹可進一階除固安令 十一年七月詔
外路官與內除者察其公勤則陞用之但苟簡于事不
須任滿便以本品出之 十二年二月尚書省奏廉到
同知城陽軍事山和尚等清疆官上曰此輩暗察明訪
皆著政聲可第其政績各進官旌賞 三月詔尚書省
賊污之官已經廉問遣使即日罷之 十八年七月諭
宰臣以職官再犯賊罪不以多寡并除名 二十年二
月詔犯罪被問之官雖遇赦不許復職 二十三年二
月御史臺進所察州縣罪命并察善惡以聞 泰和元
年十月御史臺奏在制按察司官比任終遣官考覆然
後尚書省命官覆覈之今監察御史添設員多宜分路

巡行每路女直漢人各一人同往從之仍勅分四路

四年二月諭按察司近制以鎮靜而知大體者爲稱職
苛細而闇于大體爲不稱由是各路按察以因循爲事
莫思刺舉郡縣以貪黷相尚莫能畏戢自今若糾察得
實民無冤滯能使一路鎮靜者爲稱職其或煩紊使民
不得申訴者爲曠職 四月定考課法准唐令作四善
十七最之制四善者一曰德義有聞二曰清慎名著三
曰公平可稱四曰勤恪匪懈十七最者一曰禮樂興行
肅清所部爲政教之最二曰賦役均平田野加闢爲牧
民之最三曰決斷不渝興廢當理爲判事之最四曰鈐
束吏卒姦盜不行爲督領之最五曰案部分明評議均

當爲檢校之最以上皆課縣令簿丞警巡使副錄事司
侯判官也六曰詳讞合宜咨執當理爲幕職之最七曰
盜賊消弭使人安靜爲巡捕之最八曰明于出納物無
損失爲倉庫之最九曰訓導有方生徒克業爲學官之
最十曰檢察有方行旅無滯爲關津之最十一曰堤防
堅固備禦無虞爲河防之最十二曰出納明敏數無濫
失爲監督之最十三曰謹察禁囚輕重無怨爲獄官之
最十四曰物價得實姦濫不行爲市司之最十五曰戎
器完肅捍守有方爲邊防之最十六曰議獄得情處斷
公平爲法官之最十七曰差役均平盜賊止息爲軍職
之最凡縣令以下三最以上有四善或三善者爲上陞

一等三最以上有二善者爲中減兩資歷三最以上有
一善爲下減一資歷節度判官防禦判官軍判以下一
最而有四善或三善爲上減一資歷一最而有二善爲
中陞爲榜首一最而有一善爲下陞本等首 五年十
二月更定考試隨朝檢知法條格 八年十月以軍民
共譽爲廉能官條附善最法 此條明昌四年所定

宣宗貞祐三年九月詔河北山東等路及平涼慶陽臨洮
府涇汾秦鞏德順諸州經兵四品以下職事官並以二
十月爲滿又詔司縣官能募民進糧五千石以上減一
資考萬石以上遷一官減二資考二萬石以上遷一官
陞一等注見闕

宣宗興定元年行辟舉縣令法以六事考之一曰田野闢
 二曰戶口增三曰賦役平四曰盜賊息五曰軍民和六
 曰詞訟簡六事俱備為上等陞職一等無四事者為中
 等減二資歷其次為下等減一資歷否則為不稱職罷
 而降之平常者依本格 御史張升御言進士中下甲
 及第人及監官至明威當入縣丞主簿而三事以下減
 一資歷注下令四事減二資歷注中令皆七品也若
 復八品矣輕重相戾宜更定之遂定制自今四事以下
 如前條六事完者進士中下甲及第監官當入縣丞主
 簿人減三資歷注上令餘出身者亦同此任二十月以
 上雖未秩滿若以理去官六事之跡已經覆察論陞如

秩滿例 六月制鄜邠州四品以下州縣官視環慶例

以二十月終更 八月更定監察御史失察法

時李英為御史中丞上言兵興以來百務皆弛其要在
 於激濁揚清獎進人才耳近來改定四善二十七最之
 法徒為虛文大定間數遣使分道考察廉能當時號為
 得人願改前日徒設之文遵大定已試之效庶幾人人
 自勵以為國家用納之

元制

凡官員考數省部定擬從九品擬歷三任陞從八品正
 九品歷兩任陞從八正八品歷三任陞從七從七品歷
 三任呈省正七品歷兩任陞從六從六品通歷三任陞

從五正六品歷兩任陞從五從五轉至正五緣四品闕少通歷兩任須歷上州尹一任方入四品內外從四品通理八月陞三品

世祖中統三年詔置簿立式取會各官姓名籍貫年甲入仕次第至元六年制凡隨朝職官一考陞一等兩考通陞二等止六部侍郎正四品依舊例通理八月陞三品左右司郎中員外郎都事考滿陞二等六部郎中員外郎主事三十月考滿陞一等兩考通陞二等七年尚書省臣言管民官遷轉以三十月為一考數於變易人心苟且自今請以六十月遷轉從之十年定內外官復舊制三歲一遷十一年獲嘉縣尹常德課最

諸縣詔優賞之十七年立遷轉官員法凡無過者授見闕物故及故犯選人補之滿代者令還家以俟十九年定內外官以三年為考滿任滿者遷叙未滿者不許超遷是年諸職官解由到省部考其功過以憑黜陟外任官解由到吏部止於刑部照過將各人所歷立行止簿就檢照定擬二十二年詔各道提刑按察司能遵奉條畫蒞事有成者任滿陞職贓污不稱任者罷黜除名二十八年詔改提刑按察司為肅政廉訪司每道仍設官八員除二使留司以總制一道餘六人分臨所部如民事錢穀官吏奸弊一切委之俟歲終省臺官遣官考其功效二十九年燕公楠言歲終各行省

臣赴闕奏事亦宜令行臺臣赴闕奏一歲舉刺之數制可三十三年增課守令式于八年所定五事外又增以勸課農桑克勤奉職者陞獎其怠于事者答罷之

在選 舉類

集賢直學士兼秘書少監程鉅夫奏國朝建御史臺雖有考課之目而未得其要莫可致詰乞照前朝體例應諸道府州司縣下至曹掾等各給出身印紙曆子一卷書本人姓名出身於其前俾各處長吏聯銜結狀保明書其歷任月日在任功過于後秩滿有司詳視而差其殿最則人之賢否一覽而知考核得實庶無僥倖東平布衣趙天麟上太平金鏡策畧曰舉世英賢多皆一節

為人上者取節可也今國家選法腹外三年為一考腹內二年半為一考自非負罪之員皆有進而無退臣以為方今選法宜以賢能為先不宜以日月為上且人才有大有小例以初仕者職小則淹滯英才例以久宦者職遷則施為安得皆稱切恐郡縣之官以苟且存心有更張之事則計之曰三年之後吾將去此何勞吾心哉因循而已矣見賄賂之物則思之曰一旦交代未獲即除何以為家費哉營資而已矣又况郡縣之民迎新送故甚為勞費其弊將至於無如之何者或以郡縣之官久則擅權生事錢穀之官久則私弊難制臣謂此言非也若循三德八才而用之則皆才德應官之人矣伏望

陛下量其長短察其可否細木常使爲楠大木常使爲
采凡內外官員三年第一考爲初考上等加官階二級
中加一級下則仍舊階而上中下三等皆復守其本職
六年再考如初考而復守本職九年終考如再考然後
黜陟其職也凡考法令廉訪司官重其保結考其行實
而牒司路以達于上司銓定階次籍記倚閣凡三考黜
陟其事業循常者依累次官階而除之以次第所宜其
才德超異者雖階次甚卑而待之以不次之位如是則
居官守祿者旣思階次之超陞而盡其公道又懼憲職
之知覺而減其私心庶幾乎選法有以定矣

天麟論考幽明曰唐朝以體貌豐偉爲貴所謂市瓜喜

大而或失其香晉室以清談虛曠爲先所謂畫餅充饑
而委無真用此唐之不能及三代而晉之不能及漢唐
也今國家入仕之門太多考選之方太闕臣以爲王者
之左右陪僕亦貴乎正不正則如蝎蠹之內生天下之
大官小吏並須乎賢不賢則如蝗螟之外起臣謹依經
考史斷以愚意條陳聖人之九徵及當今所切二十六
美之三十九類與夫三要惟陛下察之所謂九徵者一
曰遠使之而觀其忠二曰近使之而觀其敬三曰煩使
之而觀其能四曰卒然問焉而觀其智五曰急與之期
而觀其信六曰委之以財而觀其仁七曰告之以危而
觀其節八曰醉之以酒而觀其則九曰雜之以處而觀

其色所謂二十六美之三十九類者一曰文史之美三類草制飾詔諄悉詞情也校書正字可為定體也教誨後學才德多成也二曰禮官之美三類補衮拾遺將順其美也朝會祭祀儀章丕舉也宣慰風俗雍熙聿致也三曰樂官之美一類金石宮商條理聲正也四曰知人之美一類善惡周覽洞曉于心也五曰敬賢之美一類推轂進士常若不及也六曰考校之美一類彰善癉惡照文無失也七曰糾察之美一類彈劾所至不避權豪也八曰廉訪之美二類廉察官吏傲懼肅清也訪問風俗化成禮義也九曰宿衛之美一類小心周密京輦增威也十曰籌計之美二類帷幄畫計折衝倒戈也排壘

整陣臨時合權也十一曰督領之美三類器械精完士卒閑習也號令嚴明部伍齊肅也臨敵耀威身先士伍也十二曰鎮防之美一類勸勵稼穡勤事多獲也十四曰芻養之美一類孳蓄頭匹茁壯蕃滋也十五曰使臣之美二類喉舌宣納成美昭光也委幹事務辦濟平允也十六曰決斷之美三類勾檢考覈瑕隙無隱也要察圓明囚無間言也疑獄得情處置合律也十七曰農桑之美一類董督樹藝水旱有備也十八曰董役之美一類監役合宜丁夫悅事也十九曰關津之美一類姦詐不漏行旅不壅也二十曰營造之美一類練事分功捷于供奉也二十一曰明利之美一類出納有常簿籍易

續文獻通考卷之五十三 四百七十二折

照也二十二曰算數之美一類多寡有方了然胸臆也
二十三曰僧官之美一類弘宣釋教守戒精嚴也二十
四曰道官之美一類弘宣道教守德精嚴也二十五曰
醫官之美二類科品分明舉無不應也開發後學成材
者衆也二十六曰陰陽之美二類歷法推步授時無舛
也卜筮循經不為詭異也所謂三要者一曰公二曰廉
三曰勤徑情服事不邀功利謂之公賄賂在前不以爲
念謂之廉服勞王室悉心竭力謂之勤九徵之徵盡矣
二十六美之類備矣三要之要具矣選法考校之源委
終矣伏望陛下以九徵考左右攜僕僕臣正而厥后益
以正矣更望陛下以二十六美之三十九類與夫三要
三說明諭選曹及內外百官若三年當考之時凡一美
三要者爲上等凡一美二要者爲中等凡一美一要者
有要無美有美無要者皆爲下等凡美要並無而雖無
大罪者亦停免之凡罪犯顯明則有憲職在焉始以三
德八才用之終以二十六美三要考之則自中及外大
小官吏若玉壺之水秋霜之月凜乎其清皎乎其明矣
成宗大德八年中書省臣言自內降旨除官者果爲近侍
宿衛踐履年深依以除叙嘗宿衛未官者視散官叙始
歷一考准爲初階無資濫進降官二級官高者量降各
位下再任者從所隸用三任之上聽入常調蒙古諸人
不在此限從之

武宗至大二年令州縣正官以九年為任 三年給親民
長吏考功印曆令監治官歲終驗其行蹟書而上之廉
訪司御史臺尚書禮部考校以為黜陟

仁宗皇慶元年御史中丞郝天挺言國初設官在內須三
十月在外須三周歲考其殿最以為黜陟比者省院臺
部之臣久者一二歲少者三五月甚有旬日之間而屢
遷數易者奔走往來之不暇何暇宣風布化參理機務
哉乞自今惟大臣可急闕選授其餘內外大小官屬必
候任滿考績方許選調庶免朝除夕改啓倖長奸之弊
從之 二年命監察御史檢察監學官考其殿最 是
年勅守令勸課農桑勤者陞遷怠者黜降著為令

文宗天曆二年中書省臣言舊制朝官以三十月為一考
外任則三年為滿比年朝官卒不久于其職或數月即
改遷於典制不類且治績無從考驗請如舊制為宜勅
除風憲官外其餘朝官不許二十月內遷調

順帝至元四年詔考覆郡縣官功過命佛家間為考功郎
中喬林為員外郎魏宗為主事考覆郡縣官功過以憑
黜陟 至正四年春正月詔守令黜陟之法六事備者
陞一等四事備者減一資三事備者平遷六事不備者
降一等 六事見前至
元二十三年

皇明

太祖洪武五年十二月 勅中書令有司今後考課必書

農桑學校之績官民有不奉天時負地利及師生惰於
教學者皆論如律 山西汾州平遠縣主簿成樂考績
州上其考曰能恢辦商稅吏部以聞 上曰地之所產
有數官之所取有制若曰恢辦是額外剝削主簿之職
在佐理縣政撫安百姓豈以恢辦爲能州之考非是爾
吏部其移文訊之 十一年三月河間府知府楊冀安
等考績入朝 上命吏部曰考績之法所以旌別賢否
以示勸懲今各官來朝宜課其殿最第爲三等稱職而
無過者爲上賜坐而宴有過而稱職者爲中宴而不坐
有過而不稱職者爲下不預宴序立于門宴者出然後
退庶使有司知所激勸 十七年八月吏部尚書俞懷

定考績法

二十年三月雲南左布政張統秩滿來朝

上以統在雲南能撫綏夷人俾復職

賜璽書勞之

二十三年

勅方今所用布政司府州縣按察司官多

係民間超取秀才人材孝廉各人受職到任之後略不
以到任須知爲重公事不謀體統不行終日聽信小人
浸潤謀取賊私酷害下民以此仁義之心淪沒殺身之
計日生一旦繫獄臨刑神魂倉皇至於哀告懇切柰何
虐民在先當此之際雖欲自新不可得矣如此者往往
相繼而犯上累 朝廷下辱鄉閭悲哀父母妻子孰曾
鑑其非而改過哉所有責任條列于後

一布政司治理親臨屬府歲月稽求所行事務要察其

勤惰辨其廉能細舉到任須知內事目一一務必施行
少有頑慢及貪污坐視恬忍害民者驗其實跡奏聞
提問設若用心提調催督宣布條章去惡安善儻耳目
有所不及精神有所不至遺下貪官污吏及無籍頑民
按察司方乃是清

一府臨州治亦體布政司施行耳目有所不及精神有
所不至遺下貪官污吏及無籍頑民布政司方乃是清
一州臨縣治亦體府施行耳目有所不及精神有所不
至遺下貪官污吏及無籍頑民本府方乃是清
一縣親臨里甲務要明播條章去惡安善不至長姦損
良如此上下之分定民知有所依巨細事務庶有所歸

上不紊政於朝廷下不啣冤於滿境此其治也若耳
目有所不及精神有所不至遺下無籍頑惡之民本州
方乃是清

一各布政司不能清府府不能清州州不能清縣縣不
能去惡安善遺下不公不法按察司方乃是清

一按察司治理布政司府州縣務要盡除奸弊肅清一
方耳目有所不及精神有所不至巡按御史方乃是清
倘有通同貪官污吏以致民冤事枉者一體究治

一此令一出諸司置立文簿將行過事蹟逐一開寫每
季輪差吏典一名齎赴本管上司查考布政司考府府
考州州考縣務從實勘毋得誑惑繁文因而生事科擾

每歲進課之時布政司將本司事蹟并府州縣各齎考過事跡文簿赴京通考敢有坐視不理有違責任者罪以重刑

凡官員任滿考覈及朝覲考察各有定制若因事考察間一舉行無常例

近例唯試御史一年考覈實授試中書舍人三年考覈實授主事署郎中員外郎六年考覈實授員外郎署郎中三年考覈實授其餘京官一年考覈之例俱不行 凡一二品官考滿 賜羊酒鈔錠尚書都御史六年考滿加 太子少保九年加 太子太保吏部尚書有三年加 太子少保六年加 太子太保者 內閣三六

九年考滿應陞官秩取自 上裁其一品九年考滿或

賜宴或 賜勅獎勵及 誥命廕子等項俱出 特

恩或奉 旨查例議擬奏請 凡督撫官考滿三年六

年滿日移咨到部具奏復職仍行本官知會 嘉靖三

十一年題准宣大薊遼保定山陝延寧甘肅各邊巡撫

係僉都御史三年陞副都即照三品例廕子再考陞侍

郎加從二品俸級副都御史三年除本等廕子外陞侍

郎加正二品俸級服色再考陞部院正官即與二品應

得 誥命其以侍郎及右都御史或尚書總督三年考

滿者侍郎陞右都御史右都御史陞尚書尚書陞 官

保再考各于前官上遞陞一等即給與應得 誥命俱

要實歷邊俸及邊俸居三分之二以上者轉行兵部查無地方失事或雖曾失事而罪不掩功方准題請其有未及考滿別以軍功蒙恩者不在此限有考滿而各項恩典已得者不再重加 四十三年議准僉都三年廢子副都三年陞正二品服俸又三年加正二品封贈俱要兵部查回果有安攘之功曾經賞賚者臨時酌擬上請定奪其山西保定陝西三邊較之七邊不同止與題請陞職以上 恩典雖曾以別項軍功蒙 恩相等者亦准重加其歷俸月日中間如帶有別俸通理者必須邊俸居三分之二以上方得照例題請 隆慶五年題准在內都寺為督撫在外督撫回部院某處督撫陞

調某處督撫俱候到任支俸乃作實歷其在途在家月日不許一槩朦朧扣算若已陞調候代尚在地方理事者得准實歷離任之後截日任支待其給由吏部查理明白方為引奏 萬曆元年令以後各官考滿例該陞級者止許開具應陞緣由以俟 朝廷裁予毋得輒自定擬職任

成祖永樂元年令府州縣官到任半年之上者巡按御史按察司察其能否廉貪之跡具奏

仁宗洪熙元年令考察布按二司官不職者降為縣官宣宗宣德五年令國子監官九年考滿學行端慤者量加翰林史職仍理教事正德中議准加俸 七年令各處

巡撫侍郎同巡按御史考察方面官仍同方面官考察
州縣官直隸府州縣從巡按御史考察 十年 勅諭
直隸府州縣從吏部差官及巡按御史考察各布政司
府州縣從布政司及巡按御史考察其布按二司堂上
官從吏部都察院考察屬官從巡按御史按察司考察
英宗正統二年奏准收糧經歷三年考滿任內收糧十萬
石之上者給與 勅命不及者不准在外司府州縣及
衛首領等官九年考滿查係本部考稱者類行詢察無
碍同兩京官類題其本部考覈姑稱平常者不准今該
大學士高穀查得九年考滿既經撫按查無違碍許其
給由又經本部查考稱職復行彼處衙門取結具奏往
返動經歲月稽查未便今後止據考功司付考稱職明
白比照外官事例即與類題

景皇帝景泰三年 勅都御史等官考察天下有司官員
七年令天下府州縣官年老殘疾罷軟不任事及貪
酷生事科歛害民者許巡按巡撫并按察司堂上官會
同考察其布按二司官聽巡撫巡按官考察 三年七
月 命侍郎李賢姚夔副都御史洪英等分詣兩直隸
及十三省考察庶官不職者 按李賢曰洪英儒雅君
子時往浙江考察爲被黜者妄訴且加謗毀 朝廷不
及察而罷之今致仕二三大臣雖知其故莫能扶持朝
士皆後進不知其爲人旣去方惜彼譎智者阿世同俗

無所可否是非而因循以致高位世顧謂之能人噫此朝廷所以無任怨之臣而小人多致亂邦也

憲宗成化五年閏二月大理寺評事申安言旌異之典

朝廷所以激勸有司今撫按官於廉能者未必旌異旌異者未必廉能如紹興知府吉惠先爲上虞知縣以旌異而陞今貪酷百狀一郡之人奚罪焉乞 詔大臣議自今旌異必待三年考滿之後若所舉不公後以姦貪敗者連坐庶幾吏稱其職民安其業 十九年十一月吏科給事中王瑞等言三載黜陟 朝廷所以勵庶官之典也今天下諸司除土官外無慮九千餘處諸司官除陰陽醫僧道外無慮千萬餘員吏部於各官之賢否

在布按二司則據撫按揭帖在諸司則參布按等官揭帖上之詢訪雖出於公心下之奏報多任其私意或假公以市恩或乘機以償怨毀譽失真賢否失實其他弊端不一而足乞 諭吏部榜示各官凡揭帖所報失實者連坐或有當黜而留者許本處撫按論奏有當黜而妄訴者亦罪之 上曰朕以黜陟之典付吏部吏部以賢否之實寄長吏使其所報失實則黜陟不公賢否無別何以示勸懲于人是宜嚴連坐之罰其當黜而留與當黜而妄訴者俱如所言 二十二年奏准南京各衙門屬官首領官三年九年考滿照例赴京聽引其六年考滿從南京吏部考覈具由題奏復職免其赴京其赴

京考滿官員以給文日為始除水程四十日外扣違四箇月之上參問雖有事故亦不准理

孝宗弘治十八年 詔給由官吏紀錄過名悉與除免照例陞用收考

武宗正德四年奏准考滿以給批日為始係任滿者違限一年之上送問二年之上發回原籍致仕係三年六年給由者四箇月之上送問一年之上發回原籍致仕五年三月內該江西僉事馬慶奏稱原任南山棟道御史歷俸三年已經給由中途報世計本官考滿在先特未引奏然既得陞遷即係稱職自後考滿遇陞未經復職別無違碍者與引奏復職官一體遵行

世宗嘉靖三年奏准宣府東路懷來等城堡倉場官聽各該撫按官會議每官一員定與應該收放料草數目守支盡絕方許給由吏部覈實如果稱職照各邊收糧判官經歷事例改選 十年該本部查得 祖宗舊制在外有司官員九年考滿稱職者給與應得 誥勅至正統十四年奉有 詔書事例凡外官曾經撫按官保舉果有卓異政績者不拘三六年考滿先與應得 誥勅旌異蓋九年例得封贈者所以待常流三六年先得旌異者所以優異等 國家之制未為不備但舊例薦舉官員必須轉行巡按御史覈實明白方與奏請文移往返動經歲月以致 恩典稽遲人不知勸近該節奉

欽依但有及民善政舉保覈實便查奏給庶內外 恩
典均施以爲牧民之勸欽此照得在外官員職在臨民
比之京官勤勞數倍顯揚之願尤人情所同但近年保
舉每病其冗濫旌異之典似難加於非人合無今後撫
按官薦舉所屬應合旌異官員務要遵照正統年間

欽依事例將本人任內卓異政績明白開奏不許濫及
通候各官考滿到部察訪相同即與比照京官事體按
月類題免其再行覈實時題准衍聖公襲封照例查題

兩京堂上四品以下及欽天監太醫院翰林院正官
三品考滿請給取自 上裁兩京五品以下三年考滿
各查勘明白照例類題 十三年奏准每遇年終各府

州縣將佐貳首領屬官并衛所首領官守巡道將本道
屬官布按二司掌印官將各佐貳首領并府堂上官州
縣正官填注賢否考語揭帖印封送本布政司類齊嚴
限送部查考若二司官進表各該守巡司府照前查造
揭帖印封送進表官親遞進表官不必將通省官槩報
考語巡按任滿巡撫年終將所屬大小官填注考語揭
帖送部其考語俱要自行體訪如有雷同含糊作惡偏
私本部叅奏治罪

凡朝覲進表官考滿宣德間令來朝官員回任三六年
滿期已過者許先赴部告明令所司造冊送合干上司
考覈差人奏繳 十六年奏准回任將及考滿者亦照

宣德間例 十七年奏准考察存留官員順齋考滿文

冊者免其考覈引奏復職 十九年題准今後撫按官

于六品以下有司貪酷不法者許徑自拏問不待劾奏

二十一年題准兩京欽天監太常寺太醫院屬官及

譯字通事等官九年考滿有應陞之缺者照例陞職無

應陞之缺而原缺見在者陞俸二級仍以舊職辦事原

缺不補若係額外冗員并無見缺可陞而原缺又已補

者照例搭選不許牽合比例添註帶俸若譯字通事例

難改選者候挨次照缺陞補 二十一年奏准三年六

年考滿不依期限到任者照朝覲例過限一月之上問

罪申報二月之上送部別用三月之上罷職不叙監司

容隱不舉罪亦同之 是年定朝覲官告乞齋繳者查

其考滿年日如在七月以內方准其月日尚遠及九年

考滿者俱不准 二十二年題准太醫院屬官三六九

年考滿先送禮部填注考語轉咨吏部違越者禮部叅

究欽天監鴻臚寺通事官俱照此行 後又題准吏目

九年考滿應陞御醫者行禮部查回應否陞補方與題

請其原係署職者九年考滿止題實授職銜 時又題

准考滿官員起文之日類多隱匿過名冒報功績希圖

陞用兩考吏役初叅陞叅轉叅頂補丁憂接喪緣事服

役問革等項猶多隱詐行各該巡按御史遵照舊例將

紀錄過名教官功績民情吏役三冊督行按屬掌印官

備查明白類造年終差人齎繳到部 二十七年奏准在京各衙門給由官員堂上官務要嚴加考覈從公填注賢否的實考語封送本部以憑覈考案候考察年分查照黜陟毋得市恩避怨含糊浮泛以致是非顛倒人心不服仍行南京吏部轉行各衙門一體遵行 三十年九月原任都水司署郎中事陞山東僉事趙介夫奏因公差在外照例給由公文到部隨陞前職乞要請給原任 勅命 時題准 王府官在京未之國者歷俸三年照依京官請給 在外者歷俸九年啓 王且奏訪詢無碍方與類題 三十二年議准中書舍人及兩殿辦事中書係官恩生儒生出身者九年考滿陞

寺副帶俸辦事 三十四年題准南京官考滿給文將及三年未到部者吏部查叅冠帶閒住 三十四年奏准各衙門所屬官員六年之內未經考察者不拘陞遷見任行各堂上官開注事跡揭帖親携赴部以憑叅酌去留如有遺漏聽科道連名糾劾 四十年議准翰林院講讀學士春坊諭德品級相同准通轉俸歷考滿 四十二年議准中書係 內閣廕官出身者九年考滿陞禮部各司主事照舊帶俸辦事 四十四年議准中書係監生儒士出身九年考滿陞光祿寺署正帶俸辦事

是年又題准進表官考滿日期不遠者照朝覲例告明

齋繳

凡考滿京官候審引間如陞兩京別官品級不同及陞遷外任者俱不與引奏止類付三司知會如原係署員外郎主事陞署郎中主事者仍照舊引奏如先係署職得陞實授者不准

凡在京給由官員不拘陞俸任俸罰俸俱以見任職事所歷月日准作實歷

凡在京致仕閒住爲民起用復任官員舊例以後任俸日爲始另歷三年給由至正德六年令前後歷俸俱准

通理

凡在京官原係考滿陞俸者即同見任照俸扣滿其餘不准病痊支俸者只算實俸其患病住俸月日不准

四十五年題准今後南京各堂上官雖遇考滿之期必須本衙門見有堂官在任方許給文赴京如無堂官各先具由移咨本部知會候有官接管然後起行

穆宗隆慶元年十二月總督京營戎政鎮遠侯顧寰會巡視科道官孫枝等考閱三大營將領優劣疏名以聞得旨把總蘇奎等獎賞有差副將艾梓等策勵供職坐營官九臯等致仕遊擊楊守承等調用毛恭等革任閒住

吏科王治等疏飭吏治三事 一定等則以辨材賢欲以三等九則評論方面 二官上三則以處懷奇蘊醇器識遠大才守超然事功顯盛者中三則以處心術

不壞才守可觀職務修舉者下三則以處才守平常存
 留供職及純疵相半難以遽棄者 二公論劾以一事
 體言臣等先議有司貪酷遺奸請同方面官論拾而部
 覆許科道官各單疏論劾不必會同第恐章疏滋煩瀆
 擾 聖聽且各任已見摘傷必多故不若科道會同品
 題歸一劾其甚者得數人不為多二三人不為少雖無
 亦不為缺不必紛紛彈擊令善類過生危疑也 三修
 實政以圖治安言屯田鹽法既議遣大臣整理然其事
 亦必責成于司府州縣屯鹽專官今各官俱以應朝至
 請令悉陳所見條議上請付之所司採擇施行他如防
 邊治水諸重大事情部臣各以職掌采訪亦如之部覆

皆如其言推賢能分為九則嫌于太煩宜上中下三等
 為限而言官糾劾則以屬之吏科河南道 二年議准
 三六九年考滿官到部仍照舊例分別三等不得槩考
 稱職其平常與不稱職各官或量行別處或請 旨罷
 黜 正月 上覽直隸巡按顧廷對奏曰貪官止于罷
 黜誠不足示懲今次考察諸司職多跡著者部院列其
 罪狀奏請處治 吏部請朝覲官員擇其屢經薦舉允
 愜輿情者如正德十四年例行撫按官給賞綵段羊酒
 以示獎勸從之 吏部奏請副使張天復知縣汪堯仁
 賊罪之跡尤著宜令所司逮問如法以為貪墨之戒從
 之 三年題准除良醫典樂引禮舍人原無陞補者照

舊不考外其護衛首領典簿典膳奉祠典寶典儀工正
教授及郡王教授典膳等官務與長史審理紀善一體
查覈有老疾不謹及占缺年深者各該撫按官開奏

四年二月吏部疏請申明朝覲考察事宜先行各撫按
官悉心廉訪手注考語指實直書毋得拘泥對偶組織
浮詞抄謄舊案虛應故事其四品以上尤當奉公秉直
甄別分明以釐夙弊來朝正官如有支詞漫語應答無
據及畏避上官附和任情者先以罷軟論黜奏可 五
月吏部覈南京科道官王楨王嘉賓等條陳考察事宜
可行者六一集衆論以辨人才一嚴考劾以公黜陟一
嚴旌飭以昭勸懲一明須知以責實政一寬斥黜以惜

人才一審聽聞以求至當一抑奔競以防積弊 上命

如議行 七月掌吏部事高拱言數十年來考察懲汰
之數大較前後不相上下以是襲爲故常其數旣足雖
有不肖姑置勿論其數不足雖無其人強索以充可謂
謬矣乃其稱爲不肖者又多苛求隱細苟應故事而所
謂大奸大惡者或有所不敢問或有所不能識縱豺狼
於當路覓狐鼠以塞責此人心所爲不服也又考察半
歲之前撫按論劾俱不題覆夫爲不善者方其未露猶
或有僥倖之心少存顧忌若其旣露明知必去則將無
所不至矣而乃留之半歲民何以堪自今撫按官凡有
糾劾疏旣具即革任聽處疏下即覆其去者如考察例

不得復用其留者檄到乃覆至于考察懲汰必大奸惡一切隱細勿論斥去不肖從其多寡惟求至當毋襲故常 上是之 十月諭掌吏部事高拱等曰朝覲在邇糾察宜公自朕即位四年科道官放肆欺亂朝綱其有奸邪不職卿等嚴加考察詳實以聞高拱言京官六年考察皆吏部都察院同行惟丙辰春大學士李本掌部事考察科道奉 旨專行都察院不與焉臣愚以爲耳目宜廣宜與都察院同事 上是之 十二月掌吏部事高拱言外官考才力不及者不徒曰調用而必曰酌量調用原無定議然部院考察與撫院論劾槩以不及則銓補之日無所適從尚得遷就其間自今方面有司有才不宜於地者當移其地不易其官署曰調簡僻有官不稱其才者雖易其官當仍其品署曰調閒散亦有操守未壞性氣稍偏而尚有他長可錄年勞當叙者署曰降級或才力不宜有司文學猶堪造士者署曰改教四者皆麗不及之條者也至于先以調簡再考不及者此終難策勵即如吏科給事中韓楫議從罷斥直置罷軟之下奏可 五年題准長史有貪肆者不必候六年考察許不時叅劾以憑懲治 六年奏准陝西延寧甘固四鎮各城堡倉場官攢一年已滿許將經手錢糧呈詳撫按委官查盤明白交付接管官攢即與起送不必守支畫絕

今上萬曆元年題准各邊倉場俱照陝西事例 又題准兩殿中書官陞至正五品而止再有年勞止許加陞服俸 四年題准在外有司官滿後不計閏扣違年半之上方纔投文到部者不准考滿係三年者候六年再考六年者候九年通考 七年題准有司三六年已滿照例齋繳文冊聽撫按保留間丁憂回籍者候復除之日准補給由 又題准凡外官陞任考滿其方面有司三年已滿給文間適遇陞任本部查其陞遷月日果在任滿之後不論已未保留但公文開稱考覈稱職者一體准理如陞遷 命下而歷俸未滿即少一日不許槩准本年又題准南京官三九年考滿官員行至中途或

丁憂患病回籍服滿病痊起文到部者候復除之日准補給由 十年議准在外降俸官員除錢糧不完積穀不及數被盜失囚者待追完捕獲撫按官具奏開復內有災疲難完及擒獲別賊亦聽撫按考覈平常不稱即行議處稱職准贖先與奏復原俸然後給文考滿其三年滿後降俸者撫按查果稱職酌量具奏若遷官事發着于陞任內扣降者雖係糧穀不完被盜失囚等項既經離任亦照註誤之例 又題准在外罰俸官員考滿及期必扣除月日另歷補足撫按官方與起送或保留其罰俸月日以題奉 旨之日爲始不得以文書未到爲辭失囚失盜糧穀不及分數者未奉處分不得遽行

起文 又議准撫按官于長史以下賢否嚴訪實跡巡撫于年終巡按于復 命各造冊送部不檢者叅處有愛惜名節者 王府員缺遞陞左長史保陞服俸 又令各處衛所巡檢官係關兩處隔越者該管上司注考凡諸司置立文簿將行過事蹟逐件從實開寫承行發落緣由務要簡當每季差典吏一名依期齋赴本管上司查考布政司考府府考州州考縣務從實效除將勅諭事理令諸司進課官吏齋擎前去及行移布政司并直隸府州縣照依 勅諭事理各置紅油木牌刊刻青字於本衙門公廳上常川懸掛永爲遵守每歲進課之時將考過事跡各齋赴京奏繳以憑通考若遇三

年 朝覲來朝官吏先將舊年春夏秋三季來考冬季事跡未完許於次年進課之時令該吏進呈毋得誑惑繁文因而生事科擾 十二年題准南京官公差到京復 命已准復職計其回任半年之內遇應考滿者比照 朝覲事例免其赴京從南京吏部都察院考覈咨部題奏 凡官員任滿後務于半年之內給文除各該水程外定限十月到部若水程之外滿後不計閏無故延至一年者送問在外者提問干碍叅提者叅問若違至年半者雖有事故一併查叅處治如有規避情由及無故遞違年半者俱從重叅來議處 十三年題准倉場官收到糧草任內隨時支放周歲任滿交與新官接

管本官刻期起送若糧草數多如通京臨德等倉以數千萬計盤量不便者方令留任守支剩糧千石草萬束亦照京倉事例交盤起送若遇有查盤閱視及有監督部臣處所亦照臨德二倉事例隨交代盤量之後起送給由毋令過于三年亦不必以千石萬束爲拘

公差考課事例

凡公差官員考滿如管理各邊糧草屯種并河道輓廠及漕運理刑南直隸提學御史等官不得赴京具呈該衙門將行過事蹟并考語咨部應行河南道者候牒回覆考具題就彼復職管事其巡按審錄并各鈔關洪關等差俱候事完赴部補考 嘉靖四十五年議准南直隸

印馬屯田御史雲南貴州廣東廣西福建四川巡按御史不拘三六年若滿期已過差事未完不得赴京及南北各差未完而考滿及期遇有陞選事故者俱許具由呈部在京者聽都察院考覈在南京者聽南京部院考覈移咨吏部覈考具題應得 恩典一體請給其餘各差御史仍照舊例事完回京補考 隆慶五年題准雲貴兩廣福建四川審錄郎中等官許就差考滿具由申部其餘省分審錄官仍照例事完回京補考 又題准公差官員考滿到部正限內准作實俸若違限日久應送問者照例送問其未及送問者正限之外俱作虛曠在差陞任者必到任之日方准實俸如有假捏月日朦

臃考滿者俱聽吏部叅究罷職不叙 萬曆五年令各
邊管糧郎中三年滿日回部考察無過方許復職 八
年題准徐淮臨德天津各管倉官差內如遇三年考滿
照各邊管糧官例將行過事蹟具呈該部咨送吏部類
考行令就彼復職

考察京官

京官考察以五年爲期亦分四等年老有疾者致仕貪者
爲民不謹者冠帶閒任浮躁淺露才力不及者降一級
調外任

凡內外官遇該考察有央求勢要囑托者即以不謹黜退
凡考察京官每十年一次舉行不拘見任帶俸丁憂公差
養病省察等項俱同本衙門堂上官考察

宣宗宣德三年十二月 勅南京刑部侍郎段民考察京
官

按宣德三年 勅段民考察在京百司以民廉介端謹
也民武進人永樂二年進士庶吉士與修永樂大典除
刑部主事與修五經四書性理大全進員外郎郎中十
九年陞山東左叅政當是時索妖婦唐賽兒急盡遼山
東北京尼旣又盡逮天下出家婦女先後幾萬人民撫
定綏輯曲爲解釋人情始安 文廟再征虜 勅民舟
車轉餉節省財力民不擾而事集 文廟在道中 勅
民與巡按御史考所過郡縣吏宣德二年召充會試考

官三年召入南京戶部爲右侍郎尋改南京刑部九年卒官貧不能喪都御史吳訥力爲經紀始克殮成化間吏部右侍郎葉盛請褒民不果

英宗正統元年奏准兩京五品以下官員從本衙門堂上官考察如有不才及老疾者本部驗實具奏定奪國子監教官禮部尚書及祭酒司業公同考察如無學行者送部別用

景皇帝景泰三年奏准六部等衙門堂上官考察各屬主事等官才力不勝者降縣典史老疾者冠帶致仕

英宗天順八年奏准本部都察院會同內閣考察在京五品以下文職并在外布按二司官有不公者許令科

道官指實劾奏南京各衙門照例考察有不公者令南京科道劾奏

憲宗成化四年令兩京文職堂上官曾經科道糾劾及年老不堪任事才德不稱職者各自陳致仕取自上裁五品以下官本部會同都察院及各堂上掌印官公同考察年老無爲貪淫酷暴者革職翰林院屬官并帶俸官譯字等官本院學士會同內閣考察

孝宗弘治元年令兩京五品以下官照例考察翰林院官亦從吏部考察其被黜之人有造言生事撫拾妄奏者發遣爲民十年令兩京官照例考察惟翰林學士不在五品之例十七年八月令京官六年一考察十

七年令翰林學士免考

武宗正德六年奏准應天府治中以下順天府經歷以下宛平大興上元江寧四縣俱從京官例考察 十六年題准詹事府坊局五品以下官照例考察學士照例免考仍會同考察

世宗嘉靖六年題准各衙門堂上五品以下官照成化以來節年舊例考察詹事府坊局等官照正德十六年例考察學士免考察遺漏者互相糾舉 六年題允各衙門堂上五品以下官照成化以來節年舊例吏部會同都察院并各本衙門堂上官考察翰林院詹事府左右春坊司經局等官及 內閣辦事譯字各衙門帶俸等

官照正德十六年例學士免考准自陳欽天監官免考南京官該南京吏部都察院會同考察 十七年十一

月 詔科道官互相糾劾原非定制近年徇利塞責往往挾私報復排擊善類甚非治體今後不許互糾其賢否着吏部都察院從公考察 二十年科臣戚賢等言郭勛張瓚樊繼祖李廷相胡守中李開先胡經夏浚王廷相王同祖黜于大計者不宜復叙而聞淵熊浹劉天和呂柝魏校程啓元程文德徐樾王幾魏良弼葉洪馬明衡王臣等雖以計黜亦宜引例錄用 上曰 宗廟災變朕方祇懼戚賢等肆意妄言顛倒是非如王幾詐僞小人亦擅引薦懷奸植黨一至于此令自引列賢等

懼輸罪乞 恩乃原之 二十四年三月大計京職南
科王燁先曾劾嚴嵩奸貪嵩嗾所私尚寶丞諸傑貽書
南考功薛應旂黜燁應旂執傑使擬欲奏聞尚書張潤
力阻不果而傑爲南兵主有物議應旂亦黜之時常州
守符驗先爲南御史亦在所黜嵩又令所親御史桂榮
劾應旂以私怨黜本郡守應旂遂補外至二十五年春
正月南科游震得爲應旂訟冤稱其抑遏官邪宜復京
秩從之支大綸又言應旂一遭蹉跌遂變初心濡足于
趙文華之門以其子白丁趙慎思疊寘首列不無遺議
三十年大計京官徐學詩以劾嚴嵩削籍其兄應豐
爲中書亦擬黜疏上 上知其枉特留復職 又題准

南京吏部都察院遇京官六年考察之期將應天府并
上元江寧二縣隨同南京官員考察其所屬在外句容
等縣每于三年朝覲之期本府堂上官帶領赴京聽候
部院考察如通州良鄉等州縣例 又題准例該考察
年着以二月內舉行將堂上五品及所屬五品以下見
任住俸公差丁憂養病侍親給假及行查未報并六年
內陞任未經考察等項官員備開脚色務在三月以內
先送本部查收約會考察 三十五年三月嚴世蕃欲
排異已乃降 中旨考察京官李本承順風指去取惟
命而間以行其私黜大臣十五人科道三十八人如葛
守禮以不附吳國倫以泣別楊繼盛公論譁然

穆宗隆慶元年議准先期三月吏部并南京吏部咨劄各衙門堂上掌印官將所屬但在應考數內者查取考語務要或賢或否明注實跡類送部院以憑面議酌處至於給事中係近侍封駁之臣例無考語止照舊規不必紛擾時 上新即位考察兩京官吏部尚書楊博都御史王廷司其事稍失平吏科都給事中胡應嘉劾奏去留不公有妨新政有 旨部院公同考察已有 旨處分胡應嘉這厮乃敢黨護同官挾私妄奏好生恣橫亂政本當重究姑董了職為民時微也首相徐階深不以爲然已而給事中辛自修等御史陳聯芳等文章請宥應嘉罪遂謫外任是年六月 召補南京禮部主事應嘉准安府人

嘉靖丙辰進士其疏大畧謂京官五品以下之去留付之吏部都察院但近日之都御史自周延以後率皆風紀不正雖云會同吏部不過唯唯承命昨楊博考察給事中鄭欽御史胡維新亦在浮薄淺露之列緣二臣志向既端議論甚正有任事任怨之誠無畏首畏尾之意如鄭欽曾條陳吏部之不公楊博遂深銜之維新亦以昔按宣大彼時博任本兵建議過激以拂本兵之心王廷都御史亦惜其風力以臺長不能救一御史之冤烏在其爲風紀哉又謂博專務沮抑言官如曲庇知府何東序之殘虐而處之善地給事中趙格以論東序而抑之外補斥御史熊迥以有疾阿文選郎中晉應槐之貪污言甚

續文獻通考卷之五十三終
三十四 四百廿共册
劉切是時王廷楊博俱上疏乞休不克廷四川南允人
嘉靖壬辰進士周延江西吉水人貌嚴肅而言笑不苟
雖文學稍劣而治才甚優居臺長數年朝望歸之 三
年題准文華武英各辦事官通行考察惟欽天監 御
用監等官照舊免考其太醫院官照例考察 四年正
月南京都察院吳時來以考察在邇請量留南科道歲
久當遷者一二人使主其事報可
今上萬曆十三年題准京外官三六年正考之後不得妄
請閏考

續文獻通考卷之五十四
皇明進士雲間王圻纂輯

選舉考 考課下

朝覲考察

皇明

國初外官每年一朝 洪武二十九年始定三年一朝之
制以辰戌丑未年爲期 朝正後本部會同都察院考
察奏請定奪其存留者俱引至 御前刑部及科道官
各露章糾劾怠職之罪一時譴責宥免皆出 上命及
宥免還任各 賜勅一道以申戒飭云
凡在外官員三年徧行 朝覲其各布政司按察司益運

續文獻通考卷之五十四

司府州縣及土官衙門流官等衙門官一員帶首領官吏各一員各理問所官一員照依到任須知依式對款攢造文冊及將原領勅諭諸司職掌內事蹟文簿具本親齎奏繳以憑考覆各衙門先儘正官正官到任日淺佐貳官到任日久必先佐貳官來朝若係裁革未及二十里長州縣止設正官首領官各一員去處只令首領官吏來朝其程途遠近各量里路比照行人馳驛日期起程本衙門速將起程月日申部遠者不許過期近者不許預先離職俱限當年十二月二十五日到京其來朝官員服色各照品級花樣及欽依今定樣製務要新鮮潔淨俱各自備腳力不許馳驛及指此爲由科擾於民

大明令凡各處府州縣有司官員在任三年不許注代許令親將三載任內行過事蹟赴京朝覲如無規避依舊復任其佐貳官首領官一體三載來朝如一時勾當輪換前來國朝定例凡天下諸司官每三年一入覲除市舶提舉司外浙江等布按順天應天所屬及直隸各府州縣鹽運行太僕苑馬鹽庫提舉司官各帶首領官吏一各布政使理問一上林苑監各署及各土官官吏各一茶馬司吏一若裁減處首領官帶吏一名照原降到任須知文冊親齎奏繳官儘正官如正官任未及三月方以次代各離任後雖有陞調別故亦須赴京

畢事不許改委其遠近照水程日期不許預離曠職先
將官吏姓名并起程日期申部限九月以裏到部其各
該官吏俱限十二月十五日至二十五日以裡到京違
限者陸續奏服色品級花樣照 欽定製務須新潔
脚力盤費聽撫按酌量不許私自馳驛及科擾

太祖洪武元年正月天下官來朝 六年春正月癸卯朔
守令來朝 上命 賜酒饌明日辭復 諭之曰慈祥
愷悌身之德也刻薄殘酷德之賊也君子成其德故惠
及於人小人養其賊故殃流於衆朕舉廉興孝崇德勸
善惟欲移風易俗若偽爲慈祥必無仁愛之實偽爲愷
悌必無樂易之誠爾等宜勉修厥德廣施惠政以副朕

八年春正月辛酉朔各省郡縣入朝 上以濟寧

知府方克勤有善政 錫燕儀曹 八年春正月癸亥

朔吏部言天下布按二司及府州縣 朝覲官凡四千
一百一十七人考其政績 詔稱職者陞平常者復其
職不稱職者降貪污者送法司罪之闕茸者免爲民

六月 上諭吏部曰天下府州縣官一歲一朝未免曠
官滋費自今定爲三年一朝齎其紀功圖冊赴部考覈
布按二司官亦然著爲令 是年八月 命吏部都察
院考察在外方面及郡縣官之昏懦不才者罷黜之
凡在外大小衙門官員考察洪武六年令監察御史及
按察司舉有過犯具奏黜陟

建文君建文二年春正月丙寅朔天下官來朝免賀

成祖永樂五年十二月廣東布政徐奇入 覲載嶺南藤

箏將以饋 廷臣邏者獲其單目以進 上視之無楊

士奇名乃獨召問故士奇曰奇自都給事中受 命赴

廣時衆皆作詩文贈之故有此餽臣時有病無所贈不

然亦不免今衆名雖具受否未可知且物甚微當亦無

他 上意解即以單目付中官令毀之一無所問 十

一年夏四月 上謂呂震曰朕嘗命布按二司及府州

縣官至京者陳民間利病近有以時和歲豐民安物阜

爲言者及驗視之田野荒蕪人民饑寒水旱蟲蝗皆不

以聞朕已寘諸法今後所言有切民情治理者宜旌賞

之否則重懲勿貸

宣宗宣德五年正月初天下 朝覲官至京 上命行在

吏部廉察其賢否又令方面官各具所屬官貪害及不

稱職者上各吏部至是吏部奏貪污者二十五人當充

邊軍老疾及鄙猥無能者五十五人當北京爲民上曰

老疾者鄙猥無能者皆罷歸爲民貪污者民之害宜發

戍邊 是年令廉察 朝覲官員貪污者發邊衛充軍

老疾鄙猥者爲民其考滿月日已過者回任後將行過

事跡造冊送今干上司依例考覈差人奏繳

英宗正統九年令廣西臨邊縣分係裁減衙門免其 朝

覲須知文冊府州縣類進 十年令 朝覲官員廉能

系... 卷之五十四 四百四

著稱治行超卓賞衣服一襲鈔一百錠仍賜宴于禮部十年春正月宴天下來朝賢能官布政丁鑑等于禮部先是刑科給事中鮑輝言天下各官來朝乞勅吏禮二部詢訪有廉能著稱治行超卓者禮部官引赴御前面獎勵賞吏部具錄姓名待其考滿舉薦擢用上從之至是會舉司府州縣官丁鑑等賜以勅諭宴于禮部是年給事中鮑輝題洪武十八年以來府縣正官佐貳官超出郡職者十有三員悉加遣官勞以尊酒永樂七年汶上縣知縣史誠賦役均平撫民有方翰林院寫勅書陞濟寧知州仍掌縣事禮部差人將酒一尊鈔一千貫織金紗衣一套賞之今來朝運使

等官丁鑑等十員係會官訪察廉能治行比衆為優宜加獎勵賞勞奉旨已與勅諭每人賞衣一套鈔一百錠禮部與宴吏部記待陞用十四年令考察存留官員內有才行兼優政跡顯著及守已廉潔人無間言者行各撫按官買辦采幣羊酒齋獎仍不次擢用英宗天順四年令朝覲官賢能卓異者賜宴及衣如例是年令朝覲官員才行超卓政績顯著者賜宴禮部仍賞衣服一襲鈔一千貫老疾者致仕罷軟無為者冠帶間住貪酷弁在逃者為民才力不及者斟酌對品改調是年春正月天下諸司官吏朝覲至京上召李賢謂曰朝覲之弊不可不革賢曰誠如

續文獻通考 卷之五十四 五

聖慮卽出榜示約不許與京官交通餽送土物亦不許
下人挾讐告害由是肅然不犯 上曰黜陟之典亦當
舉行賢曰此 祖宗舊制時吏部都察院退其不職者
數百人旌其才行超卓政績顯著者布政以下賈銓等
十人 賜以衣服楮幣禮部筵宴 命太監牛玉及李
賢王輒待宴隨於其中召布政蕭暄爲禮部尚書賈銓
爲副都御史

按是年布政官賈銓等十員弘治十五年布政等官周
孟中等六員正德九年布政等官陳恪等一十六員俱
行撫按獎勵

憲宗成化五年奏准雲南長官司免來朝州縣裁減去處
止該吏一名齊文隨司府州縣官員進繳其各府首領
官遇邊務差占亦免來朝 六年九月吏部言邇者兩
奉 詔旨以人才難得恐考察黜退官中尚有一二可
用者 命臣等集議臣等詳審得廣西平樂知府袁襄
山東泰安知州畢宗賢河南修武知縣劉昭山東濟寧
州判官張寧歷城主簿郝志道俱在被黜之數舍短取
長尚有可用其餘一時難知不敢泛舉至於伸訴奏告
之人難以准理宜照舊發遣從之 十一年春正月吏
部奏罷 朝覲官布政使楊文琳按察使王琳等一千
三十一員 十四年春正月吏部以 朝覲奏老疾罷
軟貪酷及素行不謹官二千十六員 詔老疾者致仕

罷軟不謹者冠帶閑住貪酷者為民惟福建右布政鍾清浙江按察使劉鈺江西按察使趙敵清慎正直中外所聞為權奸忌陷俱列不謹君子惜之鈺忠愍公球之仲子也學行為尤云十六年十二月吏科給事中王瑞等言比湖廣江兩寺處巡撫等官各奏所部災傷民饑盜起請免各官命官初意惟欲其安卷六八撫綏地方今民饑盜起皆各官不職所致正當罪以示警顧乃為之請留前後因仍恐為定制諸司正官既留則進退人才無由而審止憑巡按等官所報揭帖則考察之典亦應故事而已且地方多事自宜設法拯濟何至故違舊制使朝覲大

典漸至廢弛明年來朝弁在任官乞嚴加考察或有不公者聽科道糾之庶足以為徇情欺罔之戒上曰三年述職國家舊典若徇所司各庇其屬有貪暴荒怠者烏得而覈之給事中言是其令吏部知之二十三年正月吏部尚書李裕建言朝覲考察天下官員乞創立才力不及一例照品級調簡僻衙門用從之遂為定制

孝宗弘治元年令考察罷閒官吏在京潛住有擅出入禁門交結者各門官盤詰拿送錦衣衛打一百發烟瘴地面永遠充軍六年令方面知府年老未考滿罷軟無為非本部訪有實跡或有巡撫巡按止是一處開報

并其餘官員到任未及二年非老疾貪酷顯著者俱留
辦事且今朝覲之年先期行文布按二司考合屬巡撫
巡按考方面年終具奏行各該衙門立案待來朝之日
詳審考察如有不公許其伸理其科道官必待吏部考
察後有失當方許指名糾劾 八年奏准各處巡撫巡
按會同考察布按二司分直隸府州縣各鹽運司行太
僕寺苑馬寺等官賢否如無巡撫巡按會同清軍或巡
鹽考察俱無巡按自行考察其布政使按察使及分巡
分守并知府知州知縣并司寺正官各訪所屬官員賢
否開具揭帖送巡撫巡按以憑稽查其巡撫官當 朝
覲之年仍具揭帖密報本部止據見任不謹名目不許

追論素行其開報官員若愛憎任情議擬不當本部都
察院并科道官指實劾奏罪坐所由若被黜官員有不
服考察撫拾妄奏者發遣爲民 十六年奏准陝西洮
河西寧茶馬司大使等官俱免 朝覲止令該吏齋冊
應朝 十七年五月 勅吏部都察院比年考察 朝
覲官員率多撫按官考語多不得實爾等詢訪亦欠周
詳以致賢否倒置明年正旦適當 朝覲之期宜預行
撫按官從公開報爾等備悉叅詳精白一心秉持公道
庶幾澤被生民上回天意其欽承之

武宗正德八年令各處被災被兵地方許撫按官預先勘
實具奏免其正官 朝覲若有科斂害民者仍許提問

劾奏 九年令 朝覲官各陳地方利病又區處方略
吏部行各該衙門斟酌會議奏請施行 十年令 朝
覲官員庶能著稱治行超卓者賞衣一襲鈔百錠仍
賜宴于禮部至十四年給事中趙漢奏不拘官職出身
不論來朝在任行各撫按支給官錢每官買辦絲段一
表裡羊一牽酒二樽遣人齎獎超擢以彰激勸奉 旨
考察過應留官員內有才行兼優政績顯著及守已廉
潔人無間言的依擬旌獎不次超用

世宗嘉靖二年題准方面知府正官考才力不及者照京
官不及降調例不許止議調簡 六年令 朝覲考退
官員果有執法被誣奪職許大臣言官即時論辯吏部
查訪可否具奏定奪 八年令來朝官員各陳地方民
情利弊興革事宜開送二司官取其可用者類送吏部
都察院看議奏請 又令吏部將賢能官員分別等第
奏聞優等官員查照舊例奏請宴賞給與 誥勅 十
年 詔吏部將賢能官員分別等第開奏來聞優等官
員查照舊例奏請 賜宴賞賚給與 誥勅以寵異之
但要簡拔精當則人心自服如此行之庶幾人人有所
奮勵各修職業守令自重民生自安矣部院大臣其體
朕此意推廣而行毋得徒應故事 十六年以考察全
據考語未免失實令吏部都察院先事秉公查訪旌別
黜陟 十二年題准 朝覲考察預行各該撫按官將

三年內所屬大小官員不分陞調考滿丁憂起送緣事
在逃等項凡係廉勤公謹及貪酷罷軟不謹老疾才力
不及者各手注考語密封送部以憑考察務要賢否明
白去留可據如毀譽任情是非淆亂及枝詞蔓語自相
矛盾者聽本部都察院指實奏 二十四年奏准各
衙門黜退降調官員不許在京潛住造言生事撫拾妄
奏違者不分有無冠帶俱發口外爲民 二十五年令
部院嚴加查考如有貪酷實跡者不拘曾經撫按旌舉
俱要開奏罷黜

是年奏准考察後陞調事例凡應朝大小官員陞調外
任者不問已未領憑俱要到部聽候考察事畢改給憑
限赴任違者叅奏罷職 凡應朝不到官員係堪存留
人數患病者查實着令復任丁憂者查明准令守制其
不係患病丁憂者以逃論 又題准方面等官應朝逃
回者行各撫按備查因何事故如有贓私實跡嚴行本
處官司提問追贓照依律例從重問擬

穆宗隆慶元年八月以虜患免山西大同太原二府并各
屬應蔚渾翔保德岢嵐忻代八州大同懷仁山陰馬邑
靈丘廣昌靈河曲興嵐繁峙五臺靜樂臨崞定襄寧鄉
十七縣及行太僕寺正官來朝 以水災免湖廣荊漢
二府及江陵公安石首監利均州襄陽棗陽南漳宜城
穀城商州洋縣各正官來朝 南直隸浙江撫按官各

以地方災寇奏免淮揚二府及杭寧溫台四府正官來
 朝吏科王治言 朝覲大典六麻官不宜援有事例乞
 免 上命仍來朝如制 十二月 諭吏部 朝覲官
 來京 祖宗時不許各處營求於是尚書楊博等都御
 史王廷等給事中王治等各上疏請嚴行申飭內外官
 有私相問餽五城御史以聞從之 二年正月陝西副
 使姜子羔言入 覲官客有道里費及餽遺私齋宜令
 進獻羨餘以佐 國計布政司官銀三百兩按察司官
 二百苑馬行太僕二寺官一百運司及府正官二百五
 十佐貳官一百州縣正官二百佐貳官五十首領及邊
 遠者量進疏入 上曰進獻非事理 朝廷亦不籍此

足用不許第以諸司路費皆取諸民令御史查照原給
 銀數追收財庫自後進表 朝覲官更不得派給累民
 四年題准考察官員不分方面有司若才力不勝繁
 劇尤堪以原職調用者擬調簡僻地方若原非煩劇不
 堪以原職調用者擬調閒散衙門其跡涉瑕疵尚未大
 著者擬降級或才力不宜有司文學尤堪造士者擬改
 教若先經調簡再考不及者即擬罷軟仍咨行各撫按
 官以後論劾不及官員悉照前欵明白考注以憑議覆
 不許只為含糊降調之說 是年給事中光懋等題准
 兩廣見在用兵要查某處事勢危急及各省地方果有
 災傷賊情事勢重大正官必不可缺者量留數員料理

其一切零賊小災及兩廣不用兵郡縣俱要責令依期入覲奉 旨依擬 本年御史王嘉賓等奏覆考察多寡之間不當容心雖一方果有不肖固不必較數省之中以爲常亦不當視往歲之數以求加如有過跡可疑蒞任極淺者尤當容令改圖至於科道拾遺舊止及於方面而知縣以下不與焉今次仍當照例申明不許槩及有司以免風聞之誤奉 旨依行 是年題准已經考察間住復朦朧在任官員行巡按巡撫擒拿問罪冒支俸糧追去還官 是年十月 聖諭非時考察科道凡故相徐階門生故吏鄉里親友及助階攻高拱者削籍謫外有差考察之日趙貞吉惡其不公大詬于部堂

五年議覆卓異貪汙之尤者各疏名上 請賞則悉

照舊典公之 朝堂量行宴 賜以昭其寵罰則除

詔勅已追仍發撫按嚴行追贓以盡其辜不係來朝及聞報逃回者轉行各撫按官一體獎賞追問奉 旨依行 又該都給事中韓楫御史孫丕揚等條陳貪酷之罰着實舉行有按察使等官楊綵等一十五員俱廉能卓異知府等官徐必進等二十一員俱貪肆之甚通判等官畢效欽等四員俱酷烈之甚奉 旨楊綵等既賢能卓異依擬宴賞徐必進等貪酷異常都着革了職爲民仍行各該巡按御史提問具奏 是年二月 勅諭天下 朝覲官曰朕纘承大業五年於茲夙夜兢兢惟

敬天勤民是務顧四方萬國豈朕一人所能徧察所冀承流宣化乂安元元實賴爾藩臬郡縣諸臣與朕分理共圖至治茲當大計辟吏之期既令所司審復簡汰其貪害異常者仍盡法重按之政績卓異者特賜宴賚用彰彝典令爾等各還舊任尚益加省勵恪守乃職守法奉公約已惠下俾生民樂遂德澤旁流庶副朕養賢求治之意如或殃民自殖怠棄官常憲典具存朕不爾貸爾等其勉之戒之欽哉

今上萬曆元年正月奉 旨朝覲考察係重典朕臨御之初方精覈吏治圖寧邦本便行與各該撫按官將所屬官員賢否務要虛心秉公定注考語部裏還細加詢訪

有徇私報復模糊抄寫是非失實的即便參來處治來朝正官說事支漫附和的以罷軟論 是年題准今後考察凡方面已陞京堂者止聽兩京科道官論劾各撫按官不得一槩參論 二年令吏部都察院將來朝官員有廉能超衆者查實具奏引至 御前面加獎賞仍賜宴于禮部其貪酷異常者着錦衣衛拏送法司問罪不應朝者着各該巡按御史提問 本年正月 聖諭朕御極之初深思治理惟以察吏治安民生爲要務茲 朝覲考察方面有司官其中有貪酷害人及廉能超衆實心愛民的着吏部都察院不拘出身資格官職大小從公分別賢否查其實跡并保薦論劾之人另本

開坐有布政等官謝鵬舉等二十五員奉 旨這廉能
官着吏部都察院堂上官弁吏科都給事中掌河南道
御史引來會極門朕面加獎賞知府等官賈淇等一十
八員俱貪酷奉 旨這貪酷害民官都革了職為民見
在應朝的錦衣衛等送法司問其餘的各該巡按御史
提問具奏隨該錦衣衛鞫具奏 內閣張居正等題
請 欽定行禮日期奉 旨十八日行禮該部具儀來看
該吏部酌議上 請欽奉 旨先行演習本日恭荷
皇上 御會極門將見在應朝廉能官謝鵬舉等二
十員引至 御前 皇上親發 玉音你每都是好官
回去還要用心供職替朕愛養百姓在外的都傳

每知道又 命與他賞賜還與酒飯吃 五年令廉能
卓異者紀錄擢用貪酷異常者各巡按御史提問追賊
具奏 七年題准 朝覲官員回任遠限一月之上問
罪三月之上送部別用半年之上罷職不叙 十年議
准先會調用官員再考不及者查果才力綿弱即照罷
軟例間住如以別事議調才力尚有可用仍照不及例
酌量改降 十三年議准致仕官員有志甘恬退為親
告休者不得復入考察 又題准 朝覲事例凡官員
棄職回籍若情有可原事無規避曾經申請奏報稽遲
不得已而始去者撫按官遇大計之時止坐以擅離之
罪另本論斥另文章職不必類入考察數內槩坐以逃

其新選新陞輒棄官不任者查無觀望規避重情止照過違憑限事例革職間住亦不得槩以逃論 十七年

令天下諸司官吏來朝明年正旦各造事跡文冊仍畫土地人民圖本俱以十二月二十五日至京其服色各

以品級為差惟雲南遠在邊鄙特免其來 二十二年都察院奏先年事例天下 朝覲官員入京本院預將

禁約事宜請 旨出榜禁約 一謂在京官吏軍匠各色人等不許挾奸嚇騙投揭陷害外官 一謂 朝覲

官員不許交通京官營求打點即門生故屬不得私相交際 一謂被論黜官員不許捏情奏辯及父兄子孫托故代辯或因而挾仇反噬 一謂入 覲需用官員

不許明肆餽遺陰擬賄賂在京官員亦不得先送下程開設筵宴 一司府各官不許派令所屬供應及備送

鄉官禮儀 以上數端俱當嚴行申飭乃臣等又准往年餽遺之禁能止其不以菲儀顯加於間曹卑秩而不

能止其不以縉禮暗投于要地尊官是使人心愈壞而吏習愈卑即敝風難遽以轉移而矯枉不嫌于過正合

無責成于吏部分本院及九卿堂上六科十三道等官各嚴拒餽遺有暗投者即從直糾發則外官安肯甘心

餽遺自罹法網奉 旨俱依擬着實行 是年吏部尚書孫丕揚奏二十三年正月初一日例刻天下官員

朝覲本部會同都察院一應禁約事宜議案呈出示曉

論遵守 一來 朝覲官到城外在京官不許私出相見入城之日不許乘夜潛謁巧托夤緣及私令家人往還透漏消息其私求囑托節奉 明禁但其勢要官員無故而爲人薦揚伸理者所薦之人雖素稱賢能其爲鑽刺可知定以不謹論黜 一投文見部之日布按二司及知府俱遵照屢奉 欽依將所屬各司道各府佐州縣正官貪酷異常者無論撫按已劾未劾無論已經優薦具揭帖開其實跡密封到部惟各官所真知酌見毋得觀望撫按迴避勢要如各官隱匿本部別有訪聞則各官之不能察吏可知卽以不及議處 一考察過堂來朝方面弁運司各直隸府州縣官各將屬官賢否

從實聲說如有冤枉許爲辯白如有佯留許爲糾舉若狗私庇護挾忿誣害及含糊兩可觀望雷同本官才品卽此可見本部考察方面以此爲第一義毋自貽悔 一各官坐蓬節年各省官員俱于十二月二十六日坐起至考察完日止該吏科條議要將坐蓬盡行裁革隨該本部會同都察院覆奉 欽依量搭數間爲各官聽考察過堂之所各省方面官員如遇聽考之日務要鈐束屬官在寓安心靜坐其該考察之日照依派定次序坐蓬以聽掣籤至晚候牌方散其日用之數俱從簡省不許擡扛層架聚飲喧譁違者巡宿官吏拏獲稟究仍當謹慎火燭本部行五城兵馬司各委官一員帶領火

甲不時巡視及把截閒雜人等不許擅進蓬舍私相交
 通 一來朝官員或有假以開報賢否為由嚇取僚屬
 財物及索要土儀派令餽送者訪出以貪論有容所屬
 債房雇役并各項供給以不謹論其不遵嚴禁沿襲舊
 套潛行饋送京官者聽五城及緝事衙門照屢次題奉
 欽依緝拿重究或本部訪出特叅究治 一搭蓋蓬
 廠近經條議裁減照例劄行順天府動支官銀各役工
 食俱已究給其考察流水等冊俱係本部自造并行都
 察院謄寫如有假稱匠役及造冊人役需索財物者許
 來朝各官稟明本部拿究具見風力如聽信誑騙本部
 訪出以不及議處 一本部文冊關防嚴密如有無

棍徒指稱本部弟姪子男家人各色及吏書火房冊庫
 長班各役潛到各官稱說洗改劣考可圖倖免及抄送
 優考需求賞犒許來朝官即時拿送本部叅送法司從
 重論究本官才力可知另行優處雖已經論劾官員亦
 得分別稍從末減若各官縱容聽其詐騙者事發一併
 重究 一在京在外官吏軍民人等敢有詐冒緝事名
 色挾要來朝官員財物并捏執詞狀向各官嚇騙者許
 歇家同被害之人拿送本部轉送法司照例問遣 一
 投遞私揭節奉 明禁近來各緝事衙門通不緝拿致
 使匿名揭帖得黏布街衢甚有聽人指使捏詞奏告陷
 害官員本部密差的當人役仍行五城及緝事衙門嚴

訪拿究仍聽諸人首告拿者照舊題准事例比捉獲強盜條格陞賞原詞棄毀不行 一存留二司府州縣正官事畢之日各具揭帖一通備開某地方有何賢人伏在巖穴堪備起用有何才士抑在下僚當與振拔邊方助勦何人堪寄干城督撫重鉅何人堪授節鉞文學德行誰可備督學之選循良卓異誰可應 璽書之徵上自 廟堂之大計下至閭閻之細微何利當與何弊當革各舉所知備開報部每一樣二本以憑採擇施行各官經濟之畧具于此而可覘焉 一被黜官員即便辭朝回籍若潛住京師撻拾妄辯者不分有無冠帶黨例問發口外爲民其存留官員即依限赴任不許遲延

曠職業如違例限聽各撫按奏處治奉 旨依擬行

軍官考察事例

今上萬曆二十二年三月兵部奏兵科都給事中張棟等條陳三事 一議軍政之限所當定大約爲各省直考選軍政前後具 奏參差不一乞要一如文臣考察事例依期具疏照得考選軍政之期本部于前十月內先期題請通行各省直撫按所屬官員覆加考選依期具奏聽本部覆議上 請今據各該撫按軍政奏抄到部遲速不齊以致陸續題覆煩瑣非體相應依擬通行各省直撫按衙門凡遇五年考選軍政一如文臣考察之例無論地方煩簡路途遠近俱先時考定于該考年分

十月內齎疏到京十一月初一日赴通政司類報具
 奏本部查明類覆如有稽延後期者聽本部分該科查
 參及照各省直掌印僉書都司與衛所官俱一時考選
 郎當一疏具奏今查有同一疏者有各一疏者亦屬參
 差相應俟議以後考選軍政將各都司分別優劣叙于
 衛官之前一併具奏不得又各具疏 又議考選之例
 所當重大約各省直軍政奏冊參差違例及謂賢否失
 真進退不一乞要定為 典制照得考選例有奏冊青
 冊今查各省直有遺冊者有以青冊代奏冊送科者委
 非慎重之體應如科臣所議通行各省直撫按衙門尼
 軍門考選具奏之時以奏冊送科青冊送部以憑查核

如仍前踈漏草率者聽該科查參至各官賢否則巡撫
 年終巡按復 命將所屬武官考語造冊送部本部黜
 陟則又專憑撫按舉劾與所造考語相同質對其五年
 考選在京衛者博訪巡視京營 皇城科道等官及驗
 軍主事各開造賢否併參前後差御史平日之所薦論
 獎戒者以定去留俱無敢輕忽惟近時被薦者或擬韓
 白或擬孫吳直將並之鷹揚而盛名則難副也無幾又
 以劾去矣被劾者賊至數百賊至千餘殆不勝狼籍而
 究竟止革籍也無幾又以薦起矣是舉刺無所實據則
 用舍安得定衡如于應薦者止擬其二三實事而錄之
 不必為四六之套語若全材為難或用其所長畧其所

短不嫌並陳鼓舞之中寓砥礪之意於應劾者亦據其
二三實事而刺之無盡據訪單之風聞若貪暴顯著或
審實於被害或審實於佐証然後提問參問之後無展
轉之端查得參劾文職者節奉 聖旨前有 旨各撫
按訪有所屬官員惡跡或被告許即便嚴提干証面審
果有實跡方行論劾近來各官通不遵行始則輕行論
劾以著風力終則模糊問擬圖了前件以致公道不明
罪有枉縱今後再有這等的着吏部都察院從公查處
參治欽此參劾武職亦當遵照比例其薦之也求實則
被薦者勸不至于方進復退其劾之也求實則被劾者
懲不至于方蹶復起矣 又議武官糾拾之例所當嚴

大約為邊腹將領及錦衣衛南北司官糾拾不及無以
示懲照得武察與文察不同經文察者擯斥終身經武
察者有薦復用文察則藩臬郡邑之長俱集於 京師
採訪為便武察則止據撫按之疏以為去留此外耳目
難寄體察難周且慮棄而復用必生玩易慎無輕棄以
免數易故先年武察糾拾內止于五府錦衣衛堂上官
外止于邊腹總兵及副總兵有府衙應自陳者就其閱
歷之最少責任之最重者而糾之若副參遊守都司等
官在京營每年有巡視科道糾劾在邊腹每年有督撫
按臣糾劾而臨時又有備考察者故言官糾拾未議及
此近來人心日玩武備日弛則澄汰之法宜益加嚴至

於錦衣衛南北兩司不在自陳之例先年亦有糾拾之
例今應酌議除僉書都司及守備把總備禦提調等官
仍聽各撫按考察或不得論劾外則邊腹副叅遊擊掌
印都司及錦衣衛南北兩司凡遇考選畢日悉聽言官
糾拾如漏網者多則不拘泥于舊數以致倖免如應刺
者少則不必盡取盈于舊數而為苛求庶武弁皆知惕
勵而于軍政大有裨矣

王官考察事例

穆宗隆慶三年題准除良醫典樂引禮舍人原無陞補照
舊不考外其護衛首領典簿典膳奉祠典寶典儀工正
教授及郡王教授典膳等官務與長史審理紀善一體
查覈有老疾不謹及玷缺年深者各該撫按官開奏
五年題准長史有貪肆者不必候六年考察許不時叅
劾以憑懲治

